


ELEMBO YA MISATO

 Mbote, baninga. Tótelema sikawa mwa moke mpo na libondeli. Tógumba mitó.

² Tata na biso na Likoló, wana tozali koyoka loyembo ki—kitoko wana, to—tozali kokanisa, Nkolo. . . ete Ozali mpembeni. Mpe tobondeli ete Óyamba biso na mpokwa oyo, Nkolo, lokola bana na Yo, kolimbisa masumu ná mabe na biso, mpe kopesa biso mapamboli na Yo, mpo tozali bato na bosenga.

³ Mpe na ngonga ya nkembo oyo tozali sikawa kobika kati na yango, tozali komona, mobu na mobu, molíli ezali kobakisama se kobakisama, na mokili. Mpe Boyei ya Nkolo ezali kokóba kongenga se kongenga, wana Azali komimonisa Ye moko na. . . na Liloba na Ye mpe na kotalisama na Ye. Toyei lisusu, na mpokwa oyo, Nkolo, mpo na komeka, na liyangani oyo, mpe kobondela Yo ete Ófungolela biso, Nkolo, Elembo ya Misato oyo ya Buku oyo, mpo eyebana na biso, mpo tóyeba nini kosala, lolenge ya kobika, mpe lolenge ya kozala Baklisto ya malamú koleka.

⁴ Nabondeli, e Nzambe, ete Ósala ete moto nyonso oyo akómi naino Moklisto te, na mpokwa oyo, ásósola ete asengeli na Yo. Kokisa yango. Mpe na—nabondeli, Tata na Likoló, ete Moklisto nyonso oyo abotami mbala mibale ásosola ete asengeli kobika pene koleka ndenge azalaki kobika kala, ete biso nyonso tókoka kozala na bomoko wana ya bolingo ya Baklisto ná kondima.

⁵ Sála ete mobeli nyonso katikati na biso ábika na mpokwa oyo, Nkolo. Basósoli mpenza ete bazali na bosenga na Yo. Mpe nabondeli, Tata, ete Ópambola nyonso oyo ekosalema to ekolobama, mpo na lokumu mpe nkembo na Yo, tosengi yango na Nkombo na Yesu. Amen.

⁶ Ee, na mpokwa oyo lisusu, tosangani lisusu mpo na likambo na oyo, na mpokwa ya—ya mokolo ya misato na mpóso. Mpe tozali kotia motema na Nkolo, na mpokwa oyo, mpo na bo—bosopani monene ya mapamboli na Ye likoló na Liloba na Ye. Mpe lelo nazalaki koyekola, bó momesano, mpe komeka kokanisa makambo oyo ekolóngobana mpenza mpo na koloba, ná likambo yango, lolenge nini koloba yango, mpe bongo kotáeláká Nkolo mpo na kopesa ngai ndimbola mpe bantina ya—ya Liloba oyo ekomami. Mpe nazongisi matondi epai na Ye mpo na oyo Asili kosala mpo na biso na kati ya mpóso, mpo biso. . . na ntina na bofungwami ya Bilembo oyo.

⁷ Mpe, ngai, ntango mosusu ekozala malamú soki mokolo ya Lomingo na ntongo, na. . . Boyebi, mbala mingi. . . Tolingi te ete bato básosola biso mabe, kasi, boyebi, bino. . . Ekómaka ndenge wana. Na bongo, ntango mosusu, mokolo ya Lomingo

na ntongo, soki oyo nyonso azali na motuna na likanisi na ye na ntina na yango, ákoma yango mpe ápesa yango awa likoló na etéyelo, mokolo ya Mpóso na mpokwa, mpo nákoka komona oyo yango ezali. Na bongo nakomeka koyanola na yango mpo na bino, mokolo ya Lomingo na ntongo, soki Nkolo alingi. Nakanisi ete ekozala malamú, koleka ndenge tozalaki kokana, mpo ntango mosusu esósolamaka mabe, boyebi. Na bongo na lolenge wana nako . . . Ekozala malamú koleka ete ná—násembola yango, boyebi. Ekozala mpenza oyo yango esengeli kozala. Mpamba te, mbala mosusu, sikawa . . .

⁸ Moto moko abéngaki lelo mpe alobaki, ete—ete, abengaki mpe alingaki koyeba soki ezali solo, ete “Ntango ko—Konétolama ekosalema, kaka moto moko nde akouta na Jeffersonville mpe moko na New York, mpe baoyo nyonso batikali bakouta na mikili mosusu.” Boye, bomoni, esosolami kaka mabe. Lisusu, moto moko alobaki ete “Mokolo ya Mpóso na mpokwa, soki Nkolo apesi biso Elembo ya nsuka, na bongo Yesu akozala awa mokolo ya Lomingo na ntongo.” Bomoni? Boye ezali—ezali . . . Bomoni, bino—bino . . . Wana, wana ezali bongo te. Mpe bino . . . Ezali bongo te.

⁹ Toyebi te. Soki moto moko ayebisi yo ete ayebi ntango Ye azali koya, yeba ete bazali na libunga, mpo na kobanda, mpamba te moto moko te ayebi yango. Kasi tolingi kobika, lelo, lokola ete ezalaki mpenza sika-sikawa.

¹⁰ Nakosutukisa bino mwa moke, mpo na mwa miniti, boye bómiléngela. Na—nandimi ete Yesu akoya o ntei ya, moke koleka, miníti misato uta sikawa, ya ntango na Ye. Boyebi soki ekozala ntango boni? Pene na mibu ntuku misato na mitano. Bomoni, mibu nkóto ezali bobele mokolo moko, mpo na Ye, bomoni.

¹¹ Boye, ntango boyokaka ntóma koloba awa: “Ntango ekómi pene,” awa boye, “ntango ekómi pene.” Ntoma alobaki yango na Emoniseli. Boyebi soki eleki ntango boni? Yango ezali te . . . Yango ezalaki kaka lobi, mpo na Nzambe, ekoki ata mikolo mibale naino te.

¹² Mpe, bomoni, soki etikali miníti misato, moke koleka miníti misato ya Boyei na Ye, bomoni, ekoki kozala pene na mibu ntuku misato, toloba, mpo na biso, to eloko moko ya ndenge wana. Mpe bótala ndenge, oyo miníti misato ekozala mpo na Ye: Asili kobanda kotelema mpo na koya. Boye biso, bino . . . mbala mosusu ntango botángaka awa, Azali koloba na elobeli ya Liloba, bomoni, na elobeli na biso te.

¹³ Na bongo soki nayebaki Azali koya lobi na mpokwa, lobi na mpokwa, lobi nakoyekola mpe nakosenga na Ye ete ápesa ngai Nsango mpo na Elembo ya Minei. Mpe nakoya koteya Yango awa, kaka ndenge moko. Bomoni? Na—nalingi kozala nazosaláká, mikolo nyonso, mosala oyo nasengeli kosala soki ayei. Mpe nayebi esika mosusu te ya malamú koleka kozuama

mpenza na esika ya mosala, bomoni, na esika ya mosala mpenza. Boye, tozali bobele kokóba kino Ye áya.

¹⁴ Mbala mosusu ntango totángaka kaka, mpe, sikawa, bóyoka na bokebi mpenza. Mpe ntango botángaka, bózuaka ba-bande, bóyokaka yango na bokebi mpenza. Mpamba te, bokosósola yango na bande, mpo bazóngelaka koyoka yango na ba-bande, mpe ezalaka mpenza malamau mpe polele. Boye, bokosósola yango polele koleka kuna.

¹⁵ Sikawa, nazulikya ete moto nyonso alingi Klisto, na mpokwa oyo, mpe moto nyonso azolinga Ye.

¹⁶ Nakoyebisa bino eloko oyo, mbala mosusu, eloko oyo epesaka bato mobulu, ezali ete moto oyo ayei mpe ayokaki eteni ya liboso ya liyangani te, bomoni. Na bongo, bakómi mpe bayoki yo kolobela, kozongela likambo moko, na bongo bazui yango, eloko oyo elobamaki, kasi bayokaki na bango te eteni ya liboso. Na bongo nyonso wana ezopesa bango mobulu, bomoni, na ntango wana. Mpe bakanisaka mpenza ete likambo moko nde elobamaki ndenge mosusu, kasi E—kasi Ezali bongo te.

¹⁷ Boye, soki ozali na motuna na likambo moko oyo ososoli te, koma yango kaka na lokasa moko. Tia yango awa, na ntango nyonso katikakti na sikawa ná mpokwa ya mokolo ya mpóso. Mpe nakomeka, mokolo ya Lomingu na ntongo, ko . . . Soki ezali mwa kókóso, olobi: “Ee, nazali komituna soki likambo *oyo* elingaki koloba nini. Nasósolaki yango te.” Boyebi oyo nalingi koloba. Na bongo nakomeka koyanola na yango mpo na yo, mokolo ya Lomingu na ntongo, soki Nkolo alingi.

¹⁸ Sikawa, na mpokwa oyo, tokotángá lisusu longwa na Liloba ya kala oyo epambolami, na mokapo ya 6. Tokobanda, na mpokwa oyo, ná Elembo ya Misato. Mpe yango ezali molongo ya 5, molongo ya 5 mpe ya 6.

¹⁹ Lobi na mpokwa tokosilisa babuti-mpunda minei; mpunda ya mpembe, mpunda ya motane, mpunda ya moindo mpe mpunda ya lángi ya púú.

²⁰ Mpe nalingi koloba boye. Ete, mbala nyonso, ata na ntongo ya lelo, pene na . . . Oh, nalamukaka na ntongo-ntongo mpenza, nabandaka kobondela liboso makambo mosusu ébanda koningana, mpe nakóbaka kobondela mokolo mobimba. Kasi na ntongo ya lelo, na ntongo-ntongo, Molimo Mosanto ayaki epai nazalaki. Mpe, na polele mpenza, na—namonaki Elembo mosusu oyo kofungwama, polele mpenza. Sikawa—sikawa—sikawa, Ayokaka ngai, nayebi. Mpe nazongisi matondi mingi.

²¹ Sikawa, bókomikanisela kaka ete likambo moko ezali kosalema. Oyo, na—nabanzi ete bozali kososola yango, bomoni, kuna . . . ete likambo moko ezali kosalema. Nalingi kaka komeka losambo oyo mbala moko, mpe kotala soki bakoki kosimba likambo moko liboso ésalema mpenza. Sikawa bóbosana te,

bóbosana te likambo oyo naye bisi bino. Mpe, sikawa, Nkolo ásun ga biso.

22 Sikawa na molongo ya 5.

Wana efungolaki ye elembo ya misato, nayoki ejalina-bomoi ya misato koloba ete, Yaka . . . komona. Natali, mpe namoni mpunda ya moindo; mofandi na yango ajalaki na kilo na loboko na ye.

Nayokaki mongongo lokola na katikati na bijali-nabomoi minei koloba, Kopo moko ya blé denali moko, kopo misato ya orge denali moko; kasi bébisa mafuta, ná vinyo . . . te.

23 Sikawa tózongela yango mwa moke, Bilembo oyo tosili koleka. Mpamba te, kaka lokola na bileko ya lingomba, ee, tomekaka kozóngela yango, kobakema moko likoló na mosusu, mpo bókoka . . . Lolenge wana nde bileko ezali mpenza, na kati ya Makomi, moko ezali kobakema likoló na mosusu, kaka ndenge wana. Lokola komata na ebuteli, mpe, komata na litambé, kútu; moko ekotaka na oyo mosusu, mpe etikalaka na nsima, ndenge wana, wana ozali komata na litambé.

24 Sikawa, Bilembo oyo, ba . . . Ezali bu—Buku ya Lisiko, ekangámi na elembo. Moto nyonso asósoli yango? [Losambo balobi: “Amen.”—Mok.] Mpe Buku oyo ekangami na Bilembo Nsambo. Ezali Buku oyo ekangami na Bilembo Nsambo. Bomoni?

25 Sikawa, bómikanisela, ndenge totalisaki bino yango, tozuaki yango na Yilimiya mpe nyonso wana. Sikawa, bango, ntango bazalaki na . . . Bazalaki kokoma *boye*, likoló na—na mokanda, to na lokasa, kútu; to, lokasa te, kasi ezalaki lopo. [Ndeko Branham asaleli nkasa ya mokanda mpo na kotalisa ndenge bazalaki kolínga mpe kotia elembo na ruló.—Mok.] Mpe bazalaki kolínga yango *boye*. Sikawa, oyo . . . Na nsima, nsuka na yango ezalaki kotikala ndenge *wana*; yango nde ezali kotalisa nini ezali wana. Bongo oyo elandi etiami kaka na lolenge moko, elíngami ndenge moko, elíngami ndenge *wana*. Na bongo, na nsuka awa, ebimi ndenge *wana*, mpe etiki oyo mosusu wana.

26 Ee, yango ezalaki Buku oyo ekangami na Bilembo Nsambo. Sikawa, totikálá kozala na ba-Buku ya *boye* te, kino kala mingi te. Babuku, na ntango ya kala, ezalaki ba-ruló. Bazalaki kolínga yango. Na bongo, ntango bazali na mposa ya likambo moko to nini . . . Ndakisa, soki—soki Biblia elíngami, soki olingi kotánga Buku ya Yisaya; okobalola awa kino na Yisaya, nsima na yango ofungoli ruló Yango ndenge *wana*, bongo otángi Yango. Mpe oyo ezali Buku ya Lisiko oyo ekangami na Bilembo Nsambo.

27 Sikawa tomoni ete Mwana-mpate abimi, azui Buku na loboko na Ye oyo afandaki na Ngwende, mpe abuki Bilembo, mpe—mpe akangoli . . . mpe akangoli Yango, akangoli Bilembo mpo na bato.

28 Mpe Bizali-na-bomoi minei oyo bafandi wana, oyo toyekolaki na bileko ya lingomba, Bizali-na-bomoi minei yango moko, bokomona bango na Makomi mobimba, mpe Bango bazali Baoyo bayebisaka na ntina na bobukami ya Bilembo oyo. Sikawa, tomoni ete ezali bu—Buku ya Lisiko.

29 Na nsima tozongaki mpe tolobelaki nde—Ndeko Mosikoli, mpe toyekolaki Ye, mpo na komona oyo mosala na Ye ezalaki. Sikawa, na mibu nyonso oyo, Klisto azali kosala mosala ya Ndeko Mosikoli. Sikawa, baoyo nyonso basósoli yango, báloba: “Amen.” [Losambo balobi: “Amen.”—Mok.] Azali kosala mosala ya Ndeko Mosikoli.

30 Kasi ntango moko ekoya oyo mosala ya kosikola ekosila. Mpe ntango mosala ya kosikola esili, bongo Alongwe na Ngwende ya Nzambe, epai wapi Afandi sikawa. Kasi oyo wana ezali Ngwende na Ye te. “Ye oyo akolóngá akofanda elongo na Ngai na Ngwende na Ngai, ndenge Ngai nalongi mpe Nafandi na Ngwende ya Tata na Ngai.” Oyo wana ezali Ngwende na Ye te. Oyo wana ezali ya Molimo, Nzambe. Klisto, Mwana-mpate, ezali ya Ye te. Azali Nzambe oyo alati nzoto, bomoni; oyo azali Nzambe yango moko, alati nzoto. Sikawa, Atelemi longwa na kiti. . .

31 Liboso, liyebisi epesamaki, ete: “Nani azali na makoki ya koya kosí- . . .kozua Buku ya Lisiko oyo?” Bomoni, mpamba te mwango mobimba ya lisiko, kobanda Adama, nyonso oyo Adama abungisaki.

32 Eloko moko te ebungáká kino na Adama. Nsima na Adama, nyonso ebúngaki, na mokili. Nyonso oyo ezalaki ntango mokili ekelamaki, ebúngaki. Mpe nyonso ekweyaki elongo ná Adama, ekatisaki na ngámbo ya libulu monene, na lolenge ete moko te akokaki kozóngá, ata nzela moko te ezalaki. Moto, ntango asalaki lisumu, atikaki nzela na ye, atikaki ata nzela moko te ya kozongela mpo na ye moko. Na bongo e. . .

33 Ntango motuna oyo etunamaki; Yoane momónisi, oyo. . . mosakoli Yoane, azalaki kati na emononeli mpe amonaki yango. Mpe moto moko te na Likoló, moto moko te na mokili, moto moko te na nsé ya mabelé, to moto moko te abongaki ata mpo na kotala Buku yango. Bomoni? Sikawa bókanisa naino! Na bongo Mwana-mpate ayei, mpe Azui Buku yango. Sikawa bayebisaki Yoane ete álela lisusu te. Alobaki: “Tala, Nkosi na Yuda alongi, mpe—mpe Azali na makoki ya kozua Buku yango mpe kofungola Yango.” Na bongo, abalukaki mpo na koluka Nkosi, kasi amonaki Mwana-mpate. Mpaka abengaki, alobaki: “Nkosi asili kolóngá.” Kasi ntango ayaki kotala, ezalaki Mwana-mpate nde ázobima na Ngwende.

34 Sikawa, atikálá komona Yango liboso te. Mpo na nini? Azalaki kuna na nsima, Azalaki kosala mosala na Ye ya kolobela bato; mpamba te Azalaki kotanga makila mpo na bato, kobóndeláká mpo na bato, kino ntango moto ya nsuka, oyo

nkombo na ye esiláká kokomama na Buku ya Bomoï ya Mwana-mpate liboso na kozalisama ya mokili, ákóta. Kaka motángo ya bato wana nde bakozala kuna, esili. Esili. Bamosusu bakolinga na bango ata kokóta te; bazali ata na mposa moko te ya kokóta. Mpe boye, na nsima, ntango moto ya nsuka wana akoti, na bongo ntango ya lisiko esili.

³⁵ Na bongo Mwana-mpate akobélama mpo na kotalisa makoki na Ye likoló na baoyo Asikolaki, elingi koloba bozalisi nyonso. Mabelé ná nyonso ezali ya Ye. Bomoni? Asili kosikola yango na Makila na Ye moko. Mpe ntango Apusanaki mpo na kozua Buku oyo, mpo na kofungola Yango, ee, oh la la, bazalaki. . . Yoane alelaki lisusu te. Atalaki, mpe Mwana-mpate oyo azalaki Mwana-mpate oyo abomami. Esilaki kobomama, kasi ezalaki lisusu na bomoi. Sikawa tomonaki ete mwana-mpate oyo abomami azali mwana-mpate oyo azali kotanga makila, kotanga makila nzoto mobimba. Esilaki kobomama. Nsima na Yango kobomama, Esékwaki lisusu. Efundaki na Ngwende, tóloba, kuna nsima na Ngwende, *boye*, kobondeláká mpo na milimo nyonso oyo ekoya. Na bongo, ntango oyo ya nsuka akotaki, mpe nyonso esilaki, bu. . . Buku ya Lisiko ezalaki naino na maboko ya Nzambe. Bomoni? Sikawa Azali kaka kosala mosala ya Ndeko.

³⁶ Ndakisa, Boaze akendeki kuna, mpe Luta afandaki kaka wana kozeláká kino Boaze. . . nalingi koloba, Boaze ásala mosala ya kosí-. . . ya ndeko, ya kosikola. Bozali komikanisela ete nateyaki yango, eleki ntango molai te? Luta azalaki kolokota mbuma; mpe Luta, nyonso oyo asalaki; mpe bongo na bongo, mpe likambo ya nsuka ezalaki, Luta, kozeláká. Bozali komikanisela lolenge natalisaki yango kokokana na Lingomba? Wana, Boaze akendeki kosala mosala ya ndeko mosikoli. Asálaki yango; alongolaki sapato na ye na lokolo mpe atátolaki, mpe asikolaki Naomi, mpe, na nzela yango nde azuaki—azuaki Luta. Sikawa, boye, Luta azalaki kaka kozela, mpo asilaki kosala mosala. Asilaki kosala makambo mosusu nyonso oyo ya ndenge na ndenge, kasi akómaki kozela. Na bongo ntango. . . Lingomba ezali kozela, kopema (mingi kati na bango, mingi kati na bango bazali na kati ya putulú ya mabelé), wana Azali kosala mosala na Ye ya Ndeko Mosikoli.

³⁷ Sikawa mokili ezali kobeba se kobeba. Masumu ezali kobakisama, ná—ná maláli, ná mitungisi, ná liwa, mpe bolozi. Mibali oyo bazangi Nzambe ná basi oyo bazangi Nzambe bazali kokufa sikawa. Cancer ezali kolia bango, ná makambo nyonso mosusu, wana bazali kokoka te kozua kondima oyo esengeli mpo na kosembola loboko mpe kozua yango.

³⁸ Sikawa bótala. Kasi, na nsima, ntango nyonso wana esilaki, nsima na Ye kolob-. . . kosilisa kobondela na Ye mpo na bato, Apusani, Azui Buku na loboko na Ye. Na bongo Yoane, mpe nyonso na Likoló, ebandi. . . Milimo na nsé ya etumbelo ebandi kogánga. Tokomona yango lisusu na Elembo ya Motoba. Ndenge

basepelaki mpenza! Mpe—mpe bakweaki na nsé, bampaka, mpe basopaki mabondeli ya basantu. Mpe milimo na nsé ya etumbelo bagángaki: “Obongi, mpo Osili kosikola biso mpo na Nzambe! Mpe tokozonga na mabelé, mpo na kobika lokola bakonzi mpe banganganzambe.” Oh, ezalaki mpenza. . .

³⁹ Mpe Yoane alobaki: “Moto nyonso na Likoló, biloko nyonso na nsé ya mabelé, mpe nyonso,” bayokaki ye kokumisa Nzambe na ntina na yango. Na ntembe te, Yoane amonaki nkombo na ye Kuna, boyebi. Ntango nyonso wana!

⁴⁰ Bongo alobaki: “Abongi mpo na kozua Buku ya Lisiko.” Sikawa ezali lisusu ya Mosambisi te. Ekómi ya Mosikoli, mpe Asili kosala mosala ya lisiko.

⁴¹ Sikawa Akolakisa Lingomba makambo oyo Asalaki. Amen. Bomoni? Na bongo Azui. . . Kasi Buku yango ezali ya kakangama. Moto moko te ayebaki, ata moko te. Bayebi ete Ezalaki Buku ya Lisiko, Oyo ezalaki wana, kasi Esengeli komonisama na mikolo ya nsuka. Kokokana na Emoniseli 10, mwanje ya nsambo nde akopesa Nsango na Yango. Mpamba te, Elobaki ete: “Na ntango ya koyulama ya eleko ya lingomba ya nsambo, mwanje ya nsambo, ntango akoyula, mabombami nyonso ya Nzambe esengeli kosila, na koyula na ye.” Na bongo, nsima na Yango komonisama, Mwanje akiti longwa na Likoló, oyo ezalaki Klisto. Sikawa bómikanisela, mwanje yango azali na mokili, azali motindami.

⁴² Klisto akiti, bomoni Ye na mokapo ya 10 ya Emoniseli; atii lokolo moko likoló na mabelé, oyo mosusu likoló na mbu; monama likoló na motó na Ye, miso lokola. . . mpe makolo lokola móto, mpe bongo na bongo; atómboli loboko na Ye, mpe akati ndai na Ye oyo azali na bomoi libela na libela, na Ngwende, ete: “Ntango ekozala lisusu te.” Ntango akati ndai yango, Nkake Nsambo eyokisi mingongo na yango.

⁴³ Mpe mokomi, elingi koloba, ntango Yoane anétolamaki, asengelaki kokoma makambo oyo azalaki komona. Abandaki kokoma. Alobaki: “Kokoma Yango te.” Mpamba te. . . “Kokoma oyo Wana te.” Ezali oyo- . . . Alobaki: “Kanga Yango na elembo.” Na kati ya nini? “Kanga yango na elembo. Koloba Yango te.” Bomoni, Esengeli komonisama, kasi Ekomami ata na kati ya Liloba te.

⁴⁴ Na bongo, ntango Abandi kofungola Bilembo, tomoni ete nyonso ezalaki na bonkukú. Bomoni? Ntango Afungolaki Elembo ya Liboso, amilobelaki: “Sikawa awa Ekoloba: ‘Eksalema ete *songolo* akozua bokonzi, mpe *fulani* akosala *boye*, mpe *oyo* akosala *boye*.’”

⁴⁵ Kasi ntango esalemaki, amonaki mpunda ya mpembe kobima, mpe mobuti—mpunda likoló na yango. Ee, “Azalaki na litimbó na loboko na ye; mpe apesamaki motóle, nsima na mwa ntango,” alobaki bongo. Esili.

46 Mpe Mwana-mpate abalukaki lisusu, abendaki Elembo mosusu, mpe mobuti-mpunda ya moindo. . . ya motane abimaki. “Azalaki na. . . apesamaki mo—mopanga; mpe azalaki kokende kosala etumba; nguya monene epesamelaki ye, mpe kolongola kimia na mokili, mpe bato bábomana kati na bango.” Ezalaki, tóloba. . . kaka likambo moko ya kokamwa (boye te?), ntango Afungolaki Yango.

47 Na nsima, ekobaki koloba: “Na mikolo kaka liboso na Nkake Nsambo yango, mabombami nyonso oyo emonisami.”

48 Sikawa bótala. Nsima na yango tomoni, ndenge tozalaki koyekola, ete, na kati ya bileko, tozalaki na ba-réformateur, basakoli te. Ba-réformateur! Mpe lotomo moko na moko ememaka mosala na yango moko—na yango moko.

49 Ndakisa, moto oyo a—azali téléphoniste, azalaka mpenza électricien te. Akoki kosala mwa moke mosala yango. Mpe ndakisa, soki moto atiaka bansinga, ee, na ntembe te. . . Moto oyo atimolaka mabulu mpo na makonzi, kasi atikálá kosala mosala ya kotia bansinga te, ekozala malamú ázala mosika na oyo etali bansinga; kasi akoki kosala mwa mosala ya kotongatonga yango to eloko moko bongo.

50 Kasi ntango Eloko ya solosolo esengeli komonisama na mokolo ya nsuka, na eteni ya nsuka ya Lingomba, na ntango yango nde Nzambe alobaki ete Akotindela biso ye, kokokana na Makomi. Toyekolaki yango na bozindo mpenza, mpe Asilaki koloba liboso ete Molimo ya Eliya ekozonga kati na moto moko. Sikawa, nakanisi ete wana esilaki kolimbolama polele mpenza. Mpe biso. . . Mpe tozali kozela yango ékokisama; esika moko boye, moto moko oyo apakolami, na mikolo ya nsuka, átelema. Sikawa bokoyoka ba-fanatiki ebele, ná makambo nyonso mosusu, kasi ezali kaka—kaka komeka ko. . . Zabolo moto azali koluka komema bato mosika na moto ya solosolo, ntango akoya, bomoni. Kasi ekotalisama mpenza polele. Boyebi oyo Eliya azalaki; bólandela yango, mpe bo—bokoyeba yango. Na bongo, ntango ye. . . Sikawa, Baponami bakoyeba.

51 Bamosusu te; na ntembe te, bakoyeba yango te. Bakozanga Yango, ba-kilometre milio. Ndakisa. . . Toyekolaki nyonso wana, mpe totalisaki ndenge bazangaki Yoane, ndenge bazangaki Eliya, ndenge bazangaki Yesu, ndenge bazangaki bango na lolenge nyonso. Mpe bakosala likambo yango moko, mpamba te Biblia elobaki bakosala bongo. Bomoni? Na bongo, na ntango wana, Ekozala na komikitisa mpenza. Ekozala na pete mingi. Yango nde eko. . . nde ekosala ete bato báleka mosika na Yango. Ezali pete mingi mpo na bango. Tomoni ete ntango nyonso, ntango bato bakómaka na mayele mingi mpo batángi mingi, mpe bayebi makambo mingi, na nsima ba. . . Bato ya ndenge wana nde bazángaka yango mpenza, boyebi. Bomoni?

52 Yesu atikalá kozua bato ya ndenge wana te, mpo na (kozala) bayekoli na Ye. Azuaki bato oyo batángá te, balóbi mbisi, mpe moto moko te azalaki na ekanganeli ná mangomba na bango mpe nyonso wana. Azuaki kaka bato lokola bato nyonso, bakongoli mpako, basali bilanga, balobi mbisi, mpe bongo na bongo, mpo na kosala mosala na Ye. Bomoni? Mpamba te, ba—bayebi ete bazali na bango eloko moko te, na bongo Akoki kosala eloko moko uta na bango, bomoni. Na ntango nyonso oyo bakóbi koyeba ete bazali eloko moko te, na bongo Nzambe akoki kosala.

53 Kasi ntango babandi kokanisa ete bayebi eloko moko, na bongo: “Boyebi eloko moko te, oyo bosengeli koyeba,” nde Biblia elobi. Boye, na bongo, to—tomoni yango.

54 Sikawa, tomoni, na ntango wana, ete mabombami yango esengeli komonisama.

55 Mpe mpo na nini bato mosusu wana, Wesley, Luther, ná ba-réformateur minene wana, oyo bamemaki kolóngisama, kobúlisama, mpe eleko ya ba-Pantekotiste ná libatisi ya Molimo Mosanto mpe nyonso wana, mpo na nini basósolaki ba—baNsango oyo te? Mpo na nini bazuaki Yango te? Mpo bazalaki ba-réformateur. Bomoni?

56 Ndakisa, bózia yango na ngámbo mosusu, bato mosusu bayaki, oyo “bazalaki na nguya lokola bakonzi, kasi bazalaki bakonzi te.” Bomoni? Bomoni? Bosengeli koyeba elobeli ya Biblia ya eloko nyonso. Bomoni? Sikawa bótala malamumu. Kasi, oyo, ntina ya makambo nyonso oyo etikalaki likoló-likoló, eteni ya mabombami na ntina na kolóngisama, eteni ya mabombami ya kobulisama, eteni ya mabombami ya libatisi ya Molimo Mosanto. Mpe, mpo na nini, lolenge nini ya . . . ? Eva aliaki nde pomme, to aliaki nde grenade, to eloko moko bongo? Bomoni? Ezalaki . . . ? Momboto ya nyoka ezalaki nini? Mpe—mpe libatisi na nkombo ya “Tata, Mwana, Molimo Mosanto” to na Nkombo ya “Nkolo Yesu,” nde ezali ya solo? Mpe, oh, nkama na nkama ya makambo wana etikamaki bongo-bongo. Bomoni?

57 Bongo na ngonga ya nsuka, mobali oyo asengeli koya komonisa likambo yango, bomoni, kozua Makomi yango. Ekotalisama polele na ndenge esengeli. Bótala. Iyo, mesie. Mpe, sikawa, ekozala na yango likambo moko ya monene, ebákátá te, sikawa. Awa na Biblia, emonanaka lokola ekozala eloko moko ya monene.

58 Ezalaki monene koleka boni mpenza, ntango Yoane asengelaki kokende kobatisa kuna! Bókanisa naino sikawa. Basakoli ya kala, ya kala mpenza, Yisaya, Malaki, bango nyonso balobáká na ntina na ye, ntango akoya. Mpe ntango ayaki, azalaki na ye moto moko oyo azalaka ye moko, mobange, atángá te, ná mandefu etóndá elongi mobimba, mpe suki etéléma lokola mbinzo, amizingaki na eteni monene moko ya kala, ya loposo ya mpate; atángá ata moke te, akendá ata moke te na kelasi na

bomoi na ye, na boyebi na biso. Bomoni? Ayaki wana, kobima na lisobe, ayambamaki ata na eteyelo moko te, atelemaki wana na ebale ya Yaladene mpe abandaki kobenga bato bábongola mitema. Bokoki kobanza yango!

⁵⁹ Biblia elobi ete: “Nyonso ekozala na nkembo mingi mokolo yango, na lolenge ete ata bangomba nyonso ekokitisama, mpe mabwaku nyonso ekomatisama.” Iyo misie. “Mpe bisika nyonso ya mpasi ekoyeisama pete.”

⁶⁰ Ee, nakoki kobanza komona bato oyo wana kuna, kokanisa ete Yoane akobima kuna, to moto monene oyo akoya liboso na Klisto, mpe akozua esobe nyonso mpe akobongisa yango, mpe ekobota lisusu matiti. Bomoni? Oh, bango, nabanzi basilaki komibongisela nyonso, pene lokola bazali kosala lelo.

⁶¹ Kasi, ezalaki mpenza na komikitisa, ata bantoma bazangaki yango te. Balobaki: “Ee, mpo na nini Makomi elobi ete soki. . . Ozali kokende kuna mpo na kopesama mbeka sikawa? Mpo na nini Makomi elobi ete—ete Eliya asengeli koya liboso?”

⁶² Alobaki: “Asiláki koya, kasi boyebaki yango te. Mpe bakosala ndenge moko na Mwana na moto. Kasi, Yoane,” Alobaki, “asalaki mpenza oyo etángamaki mpo na ye kosála. Kasi basalaki na ye mpenza oyo basengelaki kosala. Mpe,” Alobaki, “ndenge moko mpe Mwana na moto asengeli konyokwama.”

⁶³ Ee, nabanzi ete na Bayuda nyonso, moko likoló na misato batikálá koyeba te ete Yesu Klisto azalaki na mokili. Ba. . . Bakokaki koyoka na ntina na fanatiki moko kuna, na esika moko boye, kasi ba likambotiaki bokebi na yango te, kokende se liboso. “Ayaki epai ya baoyo ya Ye Moko, kasi baoyo ya Ye Moko bayambaki Ye te.” Sikawa, wana nde esika nandimaka ata. . . Sikawa, elobaki te ete Akoya na ndenge ya nkúku.

⁶⁴ Kasi Konetolama ekosalema na nkúku. Boye, soki oyo wana ezalaki mpenza na nkúku, ntango Ayaki, koleka boni Konétolama ekoyebana te! Bomoni? Bakoyeba yango te. Na mbala moko bakoloba: “Ee, nakanisaki ete Konetolama esengelaki kosalema. Mpo na nini bitumbu nyonso oyo ezali kobeta mokili?”

⁶⁵ Akoloba: “Esilaki kosalema, kasi boyebaki yango te.” Bomoni? Ekosalema bongo, lokola moyibi na butú.

⁶⁶ Lokola buku moko na—natángáká, kala. Nkombo na yango nini? *Romeo ná Juliette*, ezalaki yango, to eloko moko bongo? Atikaki, atelemisaki ebuteli na mopanzi ya ndako, na lolenge moko boye. Nabós- . . . Eleki ntango molai. Ayaki, kozua ye. . . kobimisa ye na butú.

⁶⁷ Sikawa, lolenge wana nde eko—ekosalema ndenge wana, mpe ekosila koleka. Ezali te ete bakotinda etóna ya Banje awa, ná bapáwu, mpo na kotimola bankunda. Biblia elobi:

“Tokobongwana, liboso ókoka ata kobeta liso.” kaka na kobeta ya liso, nyonso ekosila, na lombangu mpenza.

Bakoloba: “Moto moko abungi.”

⁶⁸ Ee, nabanzi ete soki tokokaki kolukaluka na mokili mobimba, lelo, bato nkama mitano balimwaka na mokili mokolo na mokolo, bomoni, bato bayebaka na bango eloko moko te na ntina na yango. Esalemi kaka ete babungi na bango.

Ee, ekozala na bato mingi mpenza te nde bakokende na Konétolama yango.

⁶⁹ Sikawa, nalingi kobángisa bino te, mpe na—mpe na—na—na—nandimi te ete ekozala bongo, kasi nalingi kaka koyebisa bino oyo Ye alobaki. Mpe bino moko boyebi yango. “Ndenge ezalaki na mikolo ya Noa, oyo bato mwambe babikisamaki na nzela na mai. Bato mwambe na mokili mobimba, babikisamaki na nzela na mai.”

⁷⁰ Ee, okoloba: “Oh, la la! Ezali na ntina te ete námeke.” Yango elakisi ete ozali te na lolenge ya kondima oyo osengeli na yango.

⁷¹ Soki ekozala—ekozala kaka moto moko, ekozala ngai, amen, mpo nandimi. Bomoni? Lolenge wana nde osengeli kondima yango, bomoni: “Ekozala ngai.” Ya solo. Nalingi kobika mpenza pene na Ye, na lolenge ete nayebi ete Akozua ngai ntango Akoya. Nandimi yango. Ya solo. Boye, soki . . . Soki bato mosusu nyonso bazangi yango, ngai nakozala kuna, na ngolu na Ye. Mpamba te, Alakaki ngai yango, mpe nayebi ete nako—nakozala kuna, mpo Akoki kokosa te. Mpe nayebi ete elimo mpe bomoi na ngai ezali kotatola, mpe namekaka kobika, mokolo na mokolo, lokola Azali koya, boye ngai nde nako—nako—nakozala moto yango. Lolenge wana nde osengeli komiyokaka: “Soki bakozala mwambe, nakozala moko kati na mwambe wana; soki bakozala nkama mitano, nakozala moko kati na nkama mitano yango. Mpo na moto mosusu, nayebi te, kasi nalingi kozala moko kati na nkama mitano yango.” Bomoni? Lolenge wana nde osengeli komikaniselaka. Bomoni?

⁷² Mpe soki omikaniseli yango bongo te, eloko moko ezali kotambola malamumu te ná kondima na yo. Bomoni? Na ntango wana, ondimisami naino te ete osili kobikisama. Ozali kaka kobanza bongo. Kosala bongo te. Malamumu.

⁷³ Tokokóma na Elembo yango te, boye te? Malamumu. Nalingi ete, mpokwa moko moko . . . Nayebi te soki ezali kotungisa bino ndenge nazali kozua ntango na bino. Tokokaki kobima mwa moke liboso na ntango. Ezali mpenza te . . .

⁷⁴ Na komonisama ya makambo oyo, ya Bilembo oyo, bóbosana te, ezali na yango kaka na molongo moko. Ya liboso, elobeli liyebisi ya likambo yango, molongo ya 2. Pene na bandimbola nyonso, mpe nyonso wana, soki otángi yango, to—to otángi makanisi ya bato yango, mpe nazali na—nazalaki ntango nyonso

kondima, lokola penepene na bango nyonso wana, ete mobuti-mpunda oyo ya liboso azalaki—azalaki lingomba ya ebandeli. Kasi ntango Molimo Mosanto amonisaki yango, ekesanaki mpenza na likambo yango. Boye, nyonso oyo yango esali, ezali bobele kolakisa oyo yango ezali. Na bongo nameki. . .

⁷⁵ Sikawa, mpo na ngai, likambo oyo ezali mpenza ya bulee. Yango wana nakosepela koyanola na mituna oyo. Mpe tósala yango, ete moto nyonso ásosola yango malamú mpenza, ná baoyo bakoyoka bande mpe, básosola yango. Bomoni? Namekaki koloba mwa moke, mpokwa na mpokwa, na kotiáká mobóko, mpo na kosala ete bató. . .

⁷⁶ Kowélela mpe kotindika, mpe, bosengeli kosala bongo te. Bomoni? Kasi, ntango esalemaka, ezalaka lolenge ya bato. Mpe molunge ezali makasi na—na kati awa, mpe o—mpe ozali na kimya te.

⁷⁷ Kasi bozali mpenza, mpenza bato malamú. Ezali na molulu oyo nde natikali komona mpenza bato komitambwisa malamú koleka, na tabernacle; bafandi na kimia, mpe bamama bazali komema bana na bango na esika ya kosunga bana mike, ntango babandi kolela. Mpe nyonso ezali koleka mpenza malamú.

⁷⁸ Kasi nazali komeka kotiela yango mobóko, kino ntango nakoyoka epakolami ya Molimo likoló na ngai, mpo na koloba Maloba yango, mpo na koloba oyo emonisamelaki ngai. Na bongo, soki, na esika moko boye, na kosáláká yango, soki nasali libunga moko awa, na ntembe te, awa, liboso na bato nyonso, Akosembola yango mpo na ngai. Na—nalingi yango. Ézali—ezali. . . Nalingi ete Ézala ndenge esengeli. Ezali na ntina moko te ya kozua oyo moto abanzi. Ezali na eloko moko ya malamú, mpe—mpe tolingi nde Yango. Tolingi Nzambe ápesa biso oyo ya malamú.

⁷⁹ Boye sikawa toyekolaki oyo, babuti-mpunda oyo, wana bazalaki koya. Mpunda ya liboso, sikawa, tososoli ete ezalaki mo—motemeli-na-Klisto, oyo abimaki. Nsima na yango tomonaki, lobi na mpokwa, ete moto moko oyo abimaki lokola motemeli-na-Klisto, lokola mpunda ya mpembe, tomonaki ete azalaki na mopanga, lobi na mpokwa, kotamboláká na mpunda, mpe kobomáká bato.

⁸⁰ Sikawa, sikawa, ezalaka ntango nyonso oyo ya mokili ná oyo ya molimo. Mpe mpo na bolamu ya Lingomba, nalingi kopesa elilingi moko, liboso tókóma na bofungwami ya Elembo oyo.

⁸¹ Elingi koloba, oyo Apesaki ngai, nakomaki yango awa. Nazali na Makomi ebele awa, nkasa nsambo to mwambe, mpe lokola nazali kolobela yango.

⁸² Bótala, nalingi kopesa elilingi moko, ya Lingomba, mpe kotalisa yango mpenza polele na lolenge ete bokosengela komona yango. Bomoni?

83 Sikawa, ezalaki na mwasi na libala moko ya mokili na elanga ya Edene. Bozali koyeba lisusu lobi na mpokwa? Mwasi na libala oyo ya mokili, azalaki molingami ya Adama, akómaki naino mwasi na ye te, mpo ayebaki ye naino te lokola mwasi.

84 Kaka ndenge Maria azalaki mwasi ya Joseph, kasi ayebaki ye naino te. “Azuamaki ná zemi.” Bomoni?

85 Sikawa, liboso Adama áyeba mwasi na ye, azalaki bobele mwasi na libala mpo na ye. Malamu. Mpe tomoni ete Nzambe. . . Ye mwasi, akweyaki na elanga ya Edene mpo akangamaki na Liloba na Nzambe te.

86 Sikawa, Ayebaki ete Satana akokangolama katikati na bango, boye Apesáki bango e—esika ya kotikala nsima na yango; ya kolendisá bango. Ee, kuna, nani akokaki koyeba esika ya malamú koleka mpo na kolendisama, koleka Nzambe, soki Azali koluka kobatela bana na Ye Moko?

87 Soki nalingaki kobatela mwa Joseph na ngai, ee, ndeko, nyonso. . . Mpe nayebaki ete bomoi na ye etalelaki yango, ee, nalingaki ko. . . mpe soki nazalaki na makoki ya kosala yango. Ee, soki esengelaki kotonga etutu ya—ya metre zomi na mibale, ya béton oyo batiá mabende, yango nde. . . nalingaki kotonga yango na metre ntuku mibale na nsambo, mpo na kondimisama mpenza.

88 Soki nakoki kokanisa bongo mpo na mwana na ngai, (elingi koloba, soki alingaki kobungisa bomoi na ye, nandimi ete mwana yango alingaki kobikisama,) koleka boni ná Nzambe, mpo na mwana na Ye oyo alingaki kobunga mpo na Seko-na-seko! Asengelaki kobomba ye nsima na eloko nini? Abombaki ye nsima na Liloba na Ye Moko. Na ntango nyonso oyo ozali na kati ya Liloba wana, obatelami mpenza. “Soki boumeli kati na Ngai, mpe Maloba na Ngai kati na bino, na bongo bósenga oyo bolingi.” Ezali yango mpenza, Liloba.

89 Boye, Eva azalaki kotambola na kati ya elanga, mpe akutanaki na nyoka, moto moko ya kitoko mingi. Mpe a. . . Mpe abandaki. . . Sikawa, azalaki na ngámbo mosusu. Nzambe abikaka, afandaka, asalaka na komikitisa, na ndenge mosusu ata moke te. Bomoni? Sikawa, mama moke ya komikitisa azalaki na ye kotambola kuna, mpe Satana apusanaki wana lokola moto moko ya bwanya, ya mayele mabe, ná bizaleli kitoko. Azalaki na mposa ya kotekela ye manaka yango. Na ntango nyonso oyo. . .

90 Ata Satana azalaki nzinganzinga na ye ndenge nini; na ntango nyonso oyo atikalaki nsima na Liloba oyo, azalaki na likambo te. [Ndeko Branham abeti Biblia na ye mwa moke—Mok.] Bomoni? Boye, tika Satana ásala nyonso alingi; yo tikala kaka na Liloba. Ekosala eloko moko te.

Soki alobi: “Ee, ozali na bokono.”

“Na mapipi na Ye, ngai nabikisami.”

“Ee, okokufa.”

“Akosekwisa ngai. Alakaki yango.”

⁹¹ Bomoni, yo tikala kaka nsima na Liloba. Esili wana. Klisto Ye moko amibombaki nsima ya Liloba. “Ekomami.” Bomoni? Sikawa, tikala nsima na Liloba.

⁹² Kasi, Eva abandaki, tóloba, komitika, amitikaki na mobimba te. Atikaki kaka mwa liloba moko moke mpembeni. Mpe yango nde eloko oyo Satana alingaki ye ásala. Abimisaki ye libanda na elaka ya Nzambe, na nzela na lobánzo.

Komekaka ata moke te kobanzabanza ná Liloba na Nzambe. Ndima Yango kaka! Bomoni?

⁹³ Boye, abimaki Kuna. Mpe liboso Adama ákoka kozua ye lokola mwasi na ye, asilaki koyeisama mbindo na Satana. Mpe mwasi . . .

⁹⁴ Mpe bomonaki yango? Klisto asalaki ndenge moko, ndenge moko mpenza. Sikawa, mpo na kosikola, Nzambe asengelaki kozala wana liboso. Bomonaki yango? Maria, liboso áya epai ya Yosefe, Molimo Mosanto asilaki kokóma kuna. Amen. Bomoni? Kuna nde esika Mosikoli ayaki.

⁹⁵ Sikawa, sikawa bótala, mwasi oyo ya mokili akweyaki, mpe Nzambe afungolaki nzela moko mpo na ye ásikolama. Atako asilaki kokweya, Ye afungolaki nzela moko.

⁹⁶ Sikawa, wana ezalaki mwasi na libala ya liboso na mokili, akweyaki liboso ye ná mobali na ye bábálana. Akweyaki, na—na nzela ya lobanzo, ya—ya kobanzabanza na esika ya kotikala ná Liloba. Akweyaki. Mpe akweyaki kino na kufa, bokabwani ya Seko-na-seko. Elongo ná ye, amemaki mobali na ye ná biloko mosusu nyonso oyo ezalaki na mokili. Akweyaki!

⁹⁷ Sikawa, kasi, Nzambe oyo atóndá na mawa, afungolaki nzela mpo na kosikola mwasi yango. Sikawa Alakaki ye, koyebisaká ye ete na ntango moko, na mikolo ekoya, Liloba ya solo ekoya lisusu epai na ye. Liloba ya solo ekotalisama epai na ye. Sikawa bóbosana yango te. Mpamba te, Alakaki Klisto, na nzela na mwasi.

⁹⁸ Mpe Klisto azali Liloba. Santu Yoane 1: “Na ebandeli Liloba azalaki, mpe Liloba azalaki elongo na Nzambe, mpe Liloba azalaki Nzambe. Mpe Liloba akomaki mosuni,” bomoni, “mpe afandaki elongo ná biso.” Nzambe afandaki elongo ná biso kati na nzoto. Azalaki Liloba.

⁹⁹ Liboso na Liloba, ezalaka likanisi. Mpe likanisi esengeli kokelama. Malamu. Boye, makanisi ya Nzambe ekómaki bokeli ntango elobamaki, na nzela ya Liloba. Na ntango yango nde Atalisaka yango epai na—na yo lokola likanisi, likanisi na Ye, mpe emonisami epai na yo. Na bongo, etikalaka kaka likanisi kino yo óloba yango. Yango wana . . .

100 Mose akendeki kobondela. Likonzi na Mító na zingazinga na ye, mpe Alobaki: “Kende, sémbola língénda na yo na ngámbo ya esti, mpe loba, bénga ‘banzinzi.’”

101 Banzinzi ezalaki te. Kasi akendeki mpe asémbolaki lingemda kuna, mpe alobaki: “Tika ete banzinzi ézala.” Ata nzinzi moko ezalaki te, naino te. Azóngaki na ye. Kasi maloba yango, likanisi ya Nzambe, esilaki kolobama. Ekómi liloba, sikawa esengeli kokokisama.

102 Sikawa bomoni te esika oyo Yesu alobaki? “Soki yo olobi na ngomba oyo; ezali te soki Ngai nalobi yango. Kasi yo olobi na ngomba oyo: ‘Longwa wana.’”

103 Mpe eloko ya liboso, nabanzi, na eleko ya Mose, nzinzi moko ya monene, ya langi mai ya pondu, ebandi kosala makelele. Mpe, nsima na mwa ntango, bakómaki kilo mibale na ndambo na metre moko. Bomoni? Bautaki wapi? Ye. . . Nzambe akelaki bango. Bomoni te ndenge. . .

104 Nzambe akoki koboma mokili oyo na mpokwa oyo, ná—ná banzinzi ya mike-mike, soki Alingi. Ee, Akoki kotóndisa banzinzi ya mike-mike kino na sánzá. Eloko bobebe moko oyo Akoki kosala, ezali koloba kaka: “Banzinzi ya mike-mike ezala kino na sánzá.” Yango nde nyonso oyo ekosengela mpo na yango. Binama ya chimie te, to eloko moko te, bakobanda kaka kokóba koyikana, koyikana, koyikana. Bomoni?

105 Akoki kosala oyo Ye alingi. Azali Nzambe, Mokeli. Eloko bobele moko ya kosala ezali koloba yango. [Ndeko Branham abeti misapi na ye—Mok.] Ya solo. Azali Mokeli. Sikawa, soki tokoki bobele kosósola boni Azali monene! Bomoni? Asálaka mpenza oyo Ye alingi.

106 Afandi kuna na likoló mpe Atalaka bato, ná mwa balakisi ya kelasi oyo, bazokanisa bazali na mayele ebele, mpe koloba: “Nzambe azali te,” ná—ná nyonso wana. Ha! Ee, ezali lokola bazalaki lisusu na Babele. Na Babele. kútu.

107 Sikawa tomoni ete Nzambe ayebisaki Eva ete: “Nsima na ntango molai mpenza, Liloba ekozonga epai na yo.” Sikawa, akweyaki ndenge nini? Nalingi ete kelasi na ngai éloba yango. Akweyaki longwa na nini? Eva akweyaki longwa na nini? Liloba. Boye te? Liloba. Mpe Nzambe alobaki ete Akopesa nzela mpo na kosikola ye kozonga lisusu na Liloba. Malamu. Nsima na ntango molai mpenza, Liloba ekotalisama epai na ye. Malamu. Liloba ekoya na ntina bobele moko. Bósimba malamumu sikawa, likambo oyo nazoloba. Liloba ekoya epai na ye na ntina bobele moko, ezalaki mpo na lisiko. Malamu.

108 Kasi, kino—kino ntango wana, azalaki na eloko mosusu oyo—oyo ekosala mosala kino ntango ekokaki mpo na Liloba ya ebandeli. Sikawa bo—bososoli malamumu? [Losambo balobi: “Amen.”—Mok.] Bomoni? Ayebisaki ye ete Liloba ekoya lisusu epai na ye, kasi, kino ntango yango, Apesaki ye eloko mosusu

kino ntango yango ékoma. Boye, Apesaki ye mbeka ya kopesa, eloko mosusu mpo na Makila yango.

¹⁰⁹ Sikawa, makila yango ezalaki ya bangombe, bampate, bantaba, mpe nyonso wana, kasi ezalaki kolongola lisumu na ye te. Bomoni? Ezalaki kaka kozipa lisumu na ye. Ezalaki kolongola yango ata moke te. Ezalaki kozipa yango. Mpamba te, ezalaki makila ya nyama, mpe bomoi ya nyama ezalaka na kati ya makila ya nyama. Ezalaki eloko mosusu, kino ntango oyo ya solosolo. . . Sikawa bólata minkóto na bino.

¹¹⁰ Makila ya solosolo ya moto, ndenge oyo ya bato esengelaki kozala, elataki nzoto (Nzambe); kozanga koyebana nzoto, mongondo, mbotama na mongondo nde ebotali yango. Sikawa Liloba na Nzambe, elaka, ekómaki Makila, mpe ekómaki nzoto na kati ya Moto Yesu Klisto Mobikisi. “Makila ya bangombe, ya bantaba, ná nyonso wana. . .”

¹¹¹ Kasi sikawa bozela. Awa Nzambe apesaki elaka, kolobáká ete ekozala wana ntango Yango ekoya: “Momboto ya mwasi esengelaki konyata motó ya nyoka.” Sikawa, soki momboto na ye éuti kaka lokola euti na Adama, to lokola éutaki na nyoka, mpe bongo na bongo, boye elingaki kozala momboto ya lisumu.

¹¹² Yango nde ntina oyo Yoane alelaki. Ezalaki ata na moto moko te, mpamba te moto moko te. . . Bato nyonso bakómaki na ngámbo mosusu ya libulu, libulu monene. Kasi ntango moko ezali koya, oyo makila mosusu wana, ya nyama, ekozala lisusu te, ntango Makila ya solosolo oyo elataki nzoto eyaki: Nzambe, akómaki mosuni mpe Makila. Biblia elobaki ete Azalaki bongo. Timote ya Liboso 3:16: “Kozanga ntembe, libombami ya bonzambe ezali monene: mpo Nzambe atalisamaki kati na nzoto.” Ezali solo. Mbótámá na mongondo ekokisaki yango.

¹¹³ Sikawa, makila ya bampate ná bantaba ezalaki kozipa lisumu, kasi ezalaki kolongola yango te, mpo ezalaki makila ya banyama. Kasi esengelaki na yango kozala malamu, esengelaki kozua esika yango.

¹¹⁴ Mpe, na ntembe te, ba—bamesanaki na eloko mosusu wana, na bongo, bakóbaki kaka ndenge wana.

¹¹⁵ Mpe ntango Liloba ya solosolo, oyo elakamaki, etalisamaki kati na Yesu Klisto, Oyo atalisaki polele ete Azalaki Mwana ya Mokeli monene, Nzambe; mpe Ye moko atatulaki ete Azalaki Liloba na Nzambe na bomoi. Fiuu! Oh la la! Atalisaki polele ete Azalaki bongo. Akokaki kozalisa biloko na liloba.

¹¹⁶ Ata moto moko te, to—to eloko moko te na mokili, akoki kosala yango. Eloko moko te na mokili ekoki kokela, bobele Nzambe. Zabolo akoki kokela te. Azali mobebisi ya oyo esilá kokelama, kasi akoki kokela te. Lisumu ezali bobele boyengebene oyo ebebisami. Boyebi eloko nini nalingi koloba. Lokuta ezali nini? Ezali solo oyo etalisami mabe. Bomoni? Ekobo

ezali nini? Likambo oyo elongobani na mobeko kasi ebebisami. Nyonso kati na lisumu, lisumu ezali kaka Solo oyo ebebisami. Sikawa, ye akokaki kokela te.

117 Kasi ntango Klisto ayaki, atalisaki polele ete Azalaki Mokeli. Yango nde ezalaki Makila oyo elakamáká. Sikawa soki bolingi kotanga yango, bo. . . Tózua yango naino mwa moke. Tokozua ntango na likambo yango, ata bongo, na mpokwa oyo. Ngai. . .

118 Ekomisi ngai motema likoló-likoló. Nakanisi bato nyonso bazali na mposa ya kozonga na ndako, boyebi. Na bongo ezali. . . [Losambo balobi: “Te.”—Mok.] Sikawa tózua Misala 2. Matondi. Mpe toko. . .

119 Misala 2, mpe tokomona soki likambo yango ezali ya solo, to te, soki Atalisaki polele ete Azalaki Nzambe. Malamu. Bózua Misala 2. Sikawa, tózua awa na molongo ya 22, Petelo azali koloba, na Mokolo ya Pantekote.

Mibali na Yisalaele, boyoka maloba oyo; Yesu na Nasalete ajalaki mobali oyo Njambe atalisaki kati na bino ná misala na nguya. . . bikamwiseli mpe elembo, bisali Njambe na maboko na ye na kati na bino, pelamoko bino bino- . . . mp- . . . bino mpenza boyebi:

120 “Moto oyo atalisaki, ete ezalaki Nzambe katikati na bino.” Na makambo mpenza oyo Asalaki, etalisaki polele ete Azalaki yango. Petelo ye oyo, atelembi liboso na bato ya Sanhedrin, koyebisáká bango.

121 Nikodeme mpe ayebaki yango. Alobaki: “Rabi, biso nyonso toyebi ete Ozali Molakisi oyo auti na Nzambe, mpo moto moko te akoki kosala makambo oyo soki Auti na Nzambe te.” Bomoni? Bayebaki yango. Kasi mpo na nini?

122 Sikawa bótala malamu. Sikawa, Eva, alakamaki likambo oyo. Kasi ntango. . . Mwasi na libala wana ayaki na nsima, mpe aboyaki, ntango Liloba ya solosolo eyaki epai na ye. Boye, mwasi yango aboyaki na ye kondima; mwasi na libala ya Baebele. Mpamba te, azalaki mwasi na libala ya—ya Nzambe; Alongolaki ye, na koboma libala. Ezali bongo? Azaláká mwasi na libala ya Nzambe.

123 Bokoloba: “Ee, batikáláká kobalana naino te.” Ya solo. Kasi Yosefe alongolaki Maria liboso. . . Alingaki kolongola Maria liboso bábalana. Bomoni? Yosefe asilaki kobandama ná ye.

124 Kasi ntango Ayaki, ná Liloba oyo Asiláká koloka, ntango Ayaki mpo na fėti ya libala, Akutaki ete ye asilaki kokangama makasi ná biloko mosusu, na lolenge ete aboyaki koyamba elaka ya solosolo, oyo esiláká kopesama, Liloba, Klisto.

125 Ntango mosusu bozososola yango te. Sikawa, bótika náloba yango lisusu. Nalingi ete bósosola yango, bomoni.

126 Alakamáká, (mwasi na libala, Eva), ete Mosikoli moko akoya. Mosikoli na ye akozala Liloba. Kasi ntango Liloba yango

eyaki, ekómaki nzoto, ye aboyaki Yango. Apesamáká biloko mosusu na esika. Sikawa bóbosana yango te, “eloko mosusu.” Apesamaká biloko mosusu, mpo ákende liboso, kino Mosikoli áya. Kasi ntango Mosikoli ayaki, ye alingaki kokóba ná biloko na ye mosusu, mpe aboyaki Liloba ya solo. Bomoni yango? [Losambo balobi: “Amen.”—Mok.] Oyo wana ezalaki mwasi na libala ya Baebele.

¹²⁷ Asalaki ndenge moko, na Eva ya mibale, mwasi na libala, mama ya bato nyonso oyo bazali na bomoi na molimo. Bomoni? *Eva* elingi koloba “mama ya bato nyonso,” oyo na molimo-. . . “bato nyonso oyo bazali na bomoi.” *Eva*, “mama ya bato nyonso oyo bazali na bomoi.”

¹²⁸ Sikawa, ntango Ayaki epai ya mwasi na libala ya Moebele, azalaki mama ya bato nyonso oyo bazalaki na bomoi, kasi aboyaki Yango.

¹²⁹ Eva ya mokili akweaki, na Edene, na koyokáká lobanzo ya Satana kotelemela Liloba na Nzambe. Lolenge wana nde akweaki. Malamu, misie. Akweyaki mpo asalaki bongo.

¹³⁰ Eva ya molimo, sikawa, wana ezali lingomba, mwasi na libala ya Klisto. Ye akweaki, na Edene te, kasi na Roma, bomoni, na Likita ya Nicée, ntango aboyaki, lingomba wana ya Pantekote, oyo ekendeki kino na Nicée, mpe ayokaki lobanzo ya Roma, na esika ya kokangama na Liloba, mpe akweaki. Mpe biloko nyonso oyo ezalaki nsima na ye, zinga-zinga na ye, ekufaki elongo ná ye. Sikawa, kaka ndenge Eva ya mokili akweyaki, Eva ya molimo mpe akweyaki. Mwasi na libala ya Nzambe akweaki—akweaki na elanga; Mwasi na libala ya Klisto akweaki na Roma. Bomoni?

¹³¹ Bótala, na nzela ya lobanzo moko wana, kotelemela Liloba na Nzambe, ye mpe abungisaki makoki ya nguya na ye, epai ya Satana. Oyo, tomonaki na bofungwami ya Bilembo oyo, ete wana ezalaki Satana, mpe ezali kaka Satana kuna. Biblia elobaki ete ezali kiti mpenza ya Satana. Mpe, ndenge Eva abungisaki makoki na ye ya—ya nguya, mpe akabi yango epai ya Satana, na elanga ya Edene; lingomba, mwasi na libala ya Klisto, asálaki ndenge moko na Roma, ntango bakabáki Biblia mpo na biyambweli ná mabanzo na bango. Bomoni ndenge etalisami na elilingi?

¹³² Soki olandeli bililingi yango, osengeli kozua mbano ya malamumu. Soki loboko na ngai ezali lokola. . . Soki natikálá komimóna te, mpe namoni elilingi na ngai koya, nakoyeba mpenza ndenge nazalaka. Bomoni? Kasi, nde ndenge wana. Soki olingi komona oyo ezali koya, tálá eloko oyo esilá kozala. “Mpamba te. . . makambo nyonso ya kala ezalaki bililingi ya makambo oyo ekoya,” Biblia elobi. Malamu.

¹³³ Mpamba te, abungisaki Liloba na ye ya nguya, Liloba na Nzambe, ntango atekaki Biblia, mpe atiaki moto moko kuna, oyo

alobaka ete lingomba ezali na makoki ya kobóngola nyonso oyo balingi kobongola. Mpe basalaki yango. Mpe mwasi na libala ya Klisto, mwasi na libala ya Pantekote, atekaki nguya na ye, na Nicée, kaka ndenge Eva atekaki nguya na ye epai ya Satana na elanga na Edene. Ya solo mpenza. Malamu.

¹³⁴ Nzambe alakaki; lingomba oyo, lingomba ya pantekote oyo, koyebáká ete akosala yango; ndenge Asalaki epai ya Eva, Nzambe alakaki.

¹³⁵ Lingomba ya pantekote, bondimi ete atekaki makoki na ye ya bokulutu, liboso...nguya na ye, ntango abimaki kuna? Bondimi yango? Ye, na ntembe te, asalaki yango. Na bongo, ntina nini kozala na endimeli oyo etongami likoló na Biblia oyo te? Nalingi ete moto moko áluka oyo babéngaka Endimeli ya Bantóma, to ata liloba moko na yango na kati ya Biblia. Wana ezali endimeli ya Katoliko, endimeli ya bantóma te.

¹³⁶ Bótanga Misala 2:38, yango nde Endimeli ya bantóma, soki bazalaki na...?...Sikawa, yango nde oyo bazalaki kosalela ntango nyonso, ata bongo. Boye, soki bino...Bomoni?

¹³⁷ Boye, batekaki makoki na bango ya bokulutu. Kaka bango te, ba-Methodiste, ba-Batiste, ba-Presbytérien, ba-Pantekotiste, bango nyonso oyo batikali, basali ndenge moko. Asalaki denomination. Roma nde esalaki ete ásala bongo, asalaki denomination mpe atiaki moto moko na motó na yango. Mpe ba-Methodiste, ba-Batiste, ba-Pantekotiste ná bango nyonso, basali kaka ndenge moko, batii etonga ya bato na motó na yango. Ata Nzambe alobi nini, bango...Bino bosengeli kosala ndenge bango balobi ete bósala.

¹³⁸ Ee, ezali nini? Ezali eloko mosusu te, bobele kindumba ya molimo, mwasi ya lolenge ya mabe; iyo, mesie, bindimeli, bindimeli ya lokuta, oyo esalemi na bato. Na bongo akómaki, ntango asalaki bongo...Sikawa nakotalisa yango polele. Akómaki mwasi ya ndumba, mpo na Nzambe. Bondimaka ete Biblia elobi yango? Iyo, misie. Bana na ye ya basi basali ndenge moko.

¹³⁹ Sikawa, na Emoniseli 17, soki bolingi kokoma yango. Yoane amemamaki na Molimo, “mpe amónaki mwasi ya ndumba monene afandi likoló na...” Mpe totángaki yango lobi na mpokwa. Mpe ezalaki na bangomba nsambo kuna, ná makambo mpenza oyo asilaki kosala. Mpe asilaki kopesa mokili mbindo ya pité na ye. Boye te? “Mpe bakonzi nyonso ya mokili basalaki pité elongo na ye,” kokósa, koyiba, kobuka lokuta, kofutáká mbongo mpo na kobongola motema, ná—ná ba-neuvaine, ná makambo nyonso mosusu.

¹⁴⁰ Ee, sikawa bomikanisela, azalaki na bana basi. Ee, soki akómaki nzoto, ná système ya bibongiseli, na bongo, système yango mobimba ezali na libunga. Mpe soki Eva, na kotósáká Nzambe te, abwakaki na kati ya kufa, biloko nyonso oyo ezalaki

na nsé na ye; lingomba nyonso mpe, oyo ekómi ebongiseli, ebwakaka na kufa biloko nyonso oyo ezali na nsé na ye. Ya solo mpenza. Likambo yango mobimba esili kokweisama. Wana ezali engebene mpenza na Liloba awa. Bótánga Emoniseli 17. Mpe Biblia elobi ete “Akozikisa ye na móto, ná bana na ye nyonso elongo ná ye.” Ya solo. Elingi koloba, ba-système nyonso ya bibongiseli ekozika, elongo ná mwasi ya ndumba yango.

¹⁴¹ Sikawa, ezali maloba makasi, mpe na—nayebi bokoyoka bakolobela yango, mpe na—nalingi koyoka bálobela yango. Mpe na—na . . . Ezali mpenza ya solo. Biblia elobi bongo, boye yango esali ete ézala ya solo.

¹⁴² Akómaki “mwasi ya ndumba.” Bokoki kotánga yango na Emoniseli, mokapo ya 17. Mwasi yango asalaki nini? Asalaki pite, kotelemela Mobali na ye moko. “Ee,” bokoloba, “te, wana ezali Biblia.” Liloba ezali Nzambe. Mpe soki olongoli eloko moko . . .

¹⁴³ Okoki kolinga ete mwasi na yo ápwepwa mobali mosusu? Soki asalaki eloko mosusu te koleka oyo wana, okolinga te ete ásala yango. Akotalisa ete azali sembo te.

¹⁴⁴ “Moto nyonso oyo akolongola Liloba moko kaka na Yango, to akobakisa eloko moko kaka likoló na Yango.” Aleluya! Klisto alingi ete Mwasi na Ye ázala péto na Liloba. Lolenge wana nde Ye asengeli kozala.

¹⁴⁵ Mpamba te, eloko moko te, litónó moko te, to eteni ya moke moko te, to eloko moko te, to mokolóto moko te, ekolongolama na mobeko yango, to na Buku yango, kino Yango nyonso ékokisama. Yesu alobaki: “Likoló ná nsé ekoleka, kasi Liloba na Ngai ekoleka ata moke te.”

¹⁴⁶ Bóbakisa ata ndimbola moko te ya moto likoló na Yango. Alingaka oyo ya peto, ésangisama te, ata liseki moko te. Nakolinga te ete mwasi na ngai ásala maseki ya bolingo ná mobali mosusu moko boye. Mpe na ntango obandi koyoka mabanzo ya ndenge na ndenge, libanda na Yango, ozali koyoka, ozali kosala maseki ya bolingo ná Satana. Amen! Yango esali te ete bómiyoka basambeli? Nzambe alingi ete bótikala ya kosangisama te. Bótikala kaka ná Liloba wana. Bótikala mpenza ná Yango. Malamu.

¹⁴⁷ Nzambe alakaki ye, ndenge Alakaki Eva na elanga ya Edene, na Eva oyo ya nsuka awa. Elingi koloba, lingomba ya Pantekote, ebandeli ya lingomba, lingomba yango moko, ezali mama ya bato nyonso na bomoi, mpo, na ntango nyonso oyo basambelaka kuna. Kasi, bomoni, ntango bazui masumu na ye, bakufi elongo ná ye.

¹⁴⁸ Okomona elenge mobali moko ayei. Alobi: “Na—nalingi kosalela Nzambe.”

¹⁴⁹ Bango balobaka: “Ee, tala oyo osengeli kosala. Kende kuna mpe yambola.”

“Malamu, nakosala yango. Nkembo na Nzambe!” Kende kuna koyambola.

¹⁵⁰ “Sikawa yaka komibakisa ná biso.” Ezali yango mpenza. Ah-ha. Bomoni? Esili wana. Ha! Ezali solo, akufi wana ná yango. Bomoni? Bomoni? Yango mpenza . . . Yango nde Buku oyo ezali kolakisa, bomoni, oyo ngai nalobaka te. Mpamba te, Yango elobi boye Awa. Malamu.

¹⁵¹ Sikawa, Nzambe alakaki ye, ndenge Asakaki na Eva. Ayebisaki Eva ete ntango moko ekoya, oyo—oyo Liloba ekozonga lisusu epai na ye. Sikawa boyebi yango lisusu? Likambo oyo ye abungisaki, ekozongisama. Mpamba te, Eloko bobele moko nde ekoki kozongisa, mpe yango ezali Liloba. Yango mpenza.

¹⁵² Nalobá yango, betá masasi; soki obeti eloko okanaki te, luká epai wapi yango etengamaki. Osengeli kozonga wana mpe kobandela lisusu. Bomoni?

¹⁵³ Mpe soki ozongi, ókenda na Nicée. Wana nde esika osengeli kobandela, bomoni. Bózonga, bókende mosika na bibongiseli wana, mosika na lingomba nyonso wana. Ndenge tozali komona Bilembo yango na kobonga be mpenza.

¹⁵⁴ Nazalaki ntango nyonso komituna, bomoi na ngai mobimba, mpo na nini nazalaki kotelemela ba-système ya bibongiseli. Bato te, te. Bato bazali kaka lokola ngai to yo, to moto mosusu nyonso. Kasi système wana, système ya ba-dénomination wana, sikawa namoni yango awa. Natikálá koyeba likambo yango te kino sikawa. Mpe ezali solo.

¹⁵⁵ Nzambe alakaki na Eva ya molimo, ndenge moko Alakaki na Eva ya mokili, ete Liloba ekozongisama lisusu epai na ye. Na mikolo ya nsuka, Akozongisa na Lingomba, na Liloba ya ebandeli lisusu.

¹⁵⁶ Sikawa bóyoka na bokebi mpenza. Na—nalingi ete bóndimisama mpenza sikawa. Nzambe alakaki na Eva, ete ntango ekoya, oyo Liloba ekozongisama na nzela ya Momboto na ye. Liloba oyo, Yango moko, ekokóma Momboto. Mpe ntango bapesaki ye eloko mosusu na esika, akangamaki na eloko mosusu wana. Mpe ntango Liloba eyaki epai na ye, asalaki nini? “Naboyi yango.” Ezalaki na komikitisa mingi. Emonanaki malamau te, epai na ye. Ezalaki mpenza kitoko te. “Ndako ya bibwele? Oh, la la! la la! Moto ya ndenge wana, akendé kelasi ata mokolo moko te? Ee, nakoki kondima yango te. Oyo wana azali Masiya te. Moto oyo atiki ete bato bábeta ye ndenge wana, bongo kobenga ye ‘Masiya’? Atiki bango bákanga ye elamba na elongi, bongo bábeta ye na motó? Mpe amibengaki Mosakoli, Mosakoli ya solo, oyo atelemaki?”

¹⁵⁷ Kútu, bayebaki basakoli te. Yesu nde alobaki bongo. Alobaki: “Soki bóyebaka basakoli, bolingaki koyeba Ngai.” Ya solo.

158 Sikawa bótala. Kasi ntango Liloba eyaki epai na ye, ndenge, kaka ndenge Nzambe alobáká ete Ekoya; ye asilaki kozuela likambo Yango na lolenge mosusu. Nazolobela mwasi na libala, mwasi na libala ya Bayuda, mwasi na libala ya Baebele. Ezalaki nde Eva, mpo na kobanda. Na bongo ntango Ekómaki wana, ye alingaki Yango te. Alingaki kotikala ná biloko na ye mosusu.

159 Sikawa, Nzambe alakaki na Eva ya molimo, na Pantekote, alobáki likambo yango kutu liboso ékokisama, mibu nkama minei liboso lingomba étikala kokweya, ete bakokweya mpenza, mpe bakosala makambo oyo basalaki. Kasi, Alakaki ete na mikolo ya nsuka, Akotinda lisusu Liloba.

160 Yesu alobaki likambo yango moko ntango Azalaki na mokili; ete Akotinda Yango lisusu. Mpe, nini... Eloko nini Yango ekokuta? Ekokuta likambo yango moko oyo Ekutaki ntango Eyaki mbala ya liboso. Ya solo. Bazali na... Bango, balingaka biloko na bango mosusu na esika yango. Balingaka dénomination na bango. Balingaka bindimeli na bango. Balingaka kobika mpenza lolenge balingi na bango. Mpe balingi ete: “Ee, ngai nde *Songolo-pakala*. Nasámbelaka na lingomba *Songolo-pakala*.” Oyo Nzambe azali kosala ezosala bokeseni moko te, ata Amitalisi Ye moko ndenge nini; Akokaki kosekwisa bakufi; Akokaki kobimisa basekele ya mitema; Akokaki kosala nyonso oyo Biblia elobaki ete Akosala. Wana ékosala bokeseni ata moke te. “Soki ezali na boyokani te ná ebongiseli na ngai, Yango ezali eloko moko te.” Bomoni?

161 Kaka ndenge mwasi na libala ya Baebele asalaki, ya solo, bomoni, bayokaki moto na bango oyo azwaki esika. Nzokande Nzambe alakaki bango oyo ya solosolo. Kasi ntango oyo ya solosolo eyaki, bango balingaki Yango te. Ezalaki na komikitisa mingi.

162 Sikawa ezali ndenge moko lelo, ntango—ntango Yango ekoti na mosala. Sikawa, Nzambe alobaki, na Malaki 4, ete Akotinda Nsango na mikolo ya nsuka, oyo ekozongisa yango. Yoele alobaki: “Nakozongisa mibu nyonso.” Nyonso oyo Roma eliaki, nyonso oyo ba-Methodiste baliaki, nyonso oyo ba-Batiste baliaki, na etape oyo ya Pantekote ya ebandeli, Nzambe alobaki: “Nakozongisa yango na mokolo ya nsuka.” Ya solo.

163 Mpe Akoki kotindela biso moto ya ndenge wana, oyo akozala... Moto se moko epai oyo Nzambe atikálá kotindela Liloba na Ye ezalaki epai ya mosakoli, epai ya ba-réformateur te; epai ya basakoli. Ezalaki naino te ngonga mpo na yango. Sikawa ekómi... ngonga yango elingi kokoka, mpe nde ntina oyo tozali kozela yango éya. Ekozala na komikitisa mpe na bopolo mingi! Mpe... Oh, la la!

164 Bokanisi ete ba-Methodiste, ba-Batiste, ba-Presbiterien, ná ba-Pantekotiste ya lokumu wana bakotikala koyamba yango?

“Oh,” bokoloba, “ba-Pantekotiste?”

165 Ba-Pantekotiste ezali bato ya Laodikia. “Mozui, mpe azali na bosenga ya eloko moko te.”

166 Elobaki: “Oyebi te ete ozali mobola.” Ntango mosusu ozali kotonga bandako ya ba-milió ya ba-dollar, kasi ozali kaka mobola, mobola na molimo.

“Oh,” okoloba, “namonaka nyonso Wana.”

“Ozali mokufi miso!”

“Ee,” okoloba, “Nzambe ápambolama, nazipami.”

“Bolumbu!”

“Ee, nandimisami mpenza mpo na bana na biso ya mibali. Tozali na makindo. Bisó . . .”

167 “Kasi oyebi yango te.” Sikawa, yango ezali ya kobulungana. Sikawa, soki Biblia elobi ete Lingomba ya Laodikia ekozala na lolenge wana . . .

168 Mpe moto moko te na mokili akoki kowangana ete oyo ezali eleko ya nsuka te, mpamba te, Eleko ya Lingomba ya Laodikia, to, eleko ya lingomba ya nsambo. Mpe, tokómi wana, mibu nkóto mibale ya mibale ezali kosukisa yango. Bileko ya lingomba ezali lisusu te. Yango wana bino bandeko ya Mbula ya Nsuka, bokoki kobanda ebongiseli mosusu te. Ekozala lisusu te. Ya solo. Ekómi na nsuka. Amen. Bileko ya lingomba ekoki kozala lisusu te. Nyonso esili.

169 Kasi bongo soki nsango ya ba-pantekotiste ezalaki nsango ya nsuka . . . Elingi koloba, kolóngisama, kobúlisama, libatishi ya Molimo Mosanto, bansango misato ya nsuka, bileko ya lingomba misato ya nsuka, esali Mbotama na mobimba.

170 Ezali lokola ntango mwasi azali, alingi kobota mwana; eloko ya liboso mpenza oyo ebimaka, ezali mai, eloko elandi ezali makila, eloko elandi ezali bomoi.

171 Ntango babomaki Yesu na ekulusu, eloko oyo ebimaki na nzoto na Ye, mpo na kosala oyo ya sika . . . mpo na kosala mbo—Mbotama. Batobolaki mopanzi na Ye, Makila ná mai ebimaki, mpe: “Nazongisi Molimo na Ngai na maboko na Yo.” Oyo ebimaki na nzoto na Ye ezalaki mai, Makila, Molimo.

172 Sikawa, Yoane ya Liboso 5:7 elobeli yo na ntina na yango ete: “Biloko misato etatolaka na Likoló: Tata, Liloba (elingi koloba Klisto,) mpe Molimo Mosanto.” Mpe yango misato ezali na boyokani; ezali eloko moko te, kasi ezali na boyokani. Mpe biloko misato etátolaka . . . To: “Ezali eloko moko,” nalingi koloba. Nasali libunga esika wana. “Mpe biloko misato oyo etatolaka na mokili, ezali mai, Makila, mpe Molimo, mpe ezali na boyokani.”

173 Okoki kobulisama kozanga kolóngisama. Mpe okoki kolóngisama kozanga kobulisama. Okoki kobúlisama kozanga koyamba Molimo Mosanto. Ezalaka mpenza bongo.

174 Bayekoli, na Yoane 17:17, basilaki kobúlisama mpe bapesamaki nguya mpo na kobengana milimo mabe, kasi bazalaki naino na Molimo Mosanto te. Bomoni? Ya solo. Basengelaki komata na Pantekote, mpe kozela kino ntango Molimo Mosanto ekoya.

175 Kuna nde Yudasi atalisaki lolenge na ye. Bomoni ndenge molimo yango elekaki na kolóngisama mpe kobulisama? Kasi ntango ekómaki na nsuka, atalisaki lolenge na ye. Bomoni? Ya solo.

176 Sikawa bótala, sikawa, tokómi na ntango ya nsuka. Mpe Eva ya molimo, ndenge mok-. . . ndenge balakaki Eva ya Baebele, balakaki mwasi na libala ya Baebele ete Liloba ekozonga lisusu. Mpe mwasi na libala ya molimo ya kouta na Pantekote, ntango akweyaki na Nicée, na bongo apesamelaki elaka ete na mikolo ya nsuka, Liloba ekoya lisusu. Sikawa bokoloba, bongo. . .

177 Soki bolingi Likomi mosusu, bózua oyo, Emoniseli 10. Elobi: “Na ngonga, na ntango ya—ya mwanje ya nsuka, ntango mwanje ya nsambo (motindami ya nsambo) akobanda koyula, libombami ya Nzambe ekosila.” Bomoni? Kozongisama, bozongi na Liloba! Biblia elobaki ete motindami ya mikolo ya nsuka akozala: “Akozongisa bango lisusu na Kondima ya ebandeli, na Kondima ya batata.” Kasi bokanisi ete bakoyamba Yango? Te, misie. “Na mikolo ya nsuka, Akozongisa lisusu Liloba ya ebandeli,” ndenge Alobaki na Malaki 4.

178 Kasi abungisaki yango. Sikawa, abungisaki Liloba yango na Nicée. Eva abungisáká Yango na Edene; Eva aboyaki oyo ya ye na Kalvari. Mpe etónge ya Nicée ezali koboya Yango na mikolo ya nsuka, ndenge moko kaka. Oh, la la!

179 Kasi ntango Liloba eyaki na kati ya nzoto ya moto, ye, Eva, lingomba ya Baebele, mama ya bato nyonso ya molimo na ntango wana, aboyaki Yango. Akufaki mpenza, na mimesano mpe biyambweli na ye, na lolenge ete azangaki Yango. Ezali mpe bongo mpo na oyo, ya solo. Malamu.

180 Bazangi Ye, Liloba na bomoi oyo etalisami kati na nzoto, na nzela ya Liloba oyo elakami. Liloba elakaki kosala makambo oyo. Elaka epesamaki, ete ekozala lolenge oyo na mikolo ya nsuka. “Ndenge ezalaki na mikolo ya Sodoma, ekosala mpe bongo na Boyei ya Mwana na moto.” Sikawa bótala likambo oyo esalemaki na Sodoma. “Ndenge ezalaki na mikolo ya Noa, ekozala mpe bongo na boyei ya Mwana na moto.” Bomoni? Bótala malamau likambo oyo esalemaki na ntango yango. Bomoni? Sikawa, Alobaki ete ekozala likambo yango moko, mpe tozali kobika na mokolo yango. Ee, mpe ekoki kozala, nabanzi, nakoki kozua bilaka nkama motoba ya ndenge wana, na Makomi, oyo ezobeláká yango. Bomoni? Sikawa, kasi, baboyi Yango.

181 Akangamaki na mimesano ná eloko mosusu, na esika ya—ya. . . Akangamaki na makila mosusu, na esika ya Makila oyo

ya solosolo. Yesu, Liloba, alobaki, ntango Etalisamaki epai ya ye mwasi ete: “Lokola akangamaki na mimesano oyo. . .” Yesu, Liloba litalisami, alobaki na mwasi na libala, mwasi na libala ya Baebele ete: “Lokola okangami na mimesano na yo, osali ete Liloba na Nzambe ézanga nguya epai na yo. Ekoki kozala na nguya te.”

¹⁸² Sikawa yango nde ntina oyo lelo, ete, ko—kolamuka oyo tosengeli kozua, tozui nde kolamuka ya ba-denomination. Tozui mpenza kolamuka ya solosolo te. Te, te, te. Te, misie. Bókanisa te ete tozali na kolamuka. Tozali na yango te. Oh, bazali na bandimi ya mangomba milió na milió na milió, kasi kolamuka ezali esika moko te. Te. Te.

¹⁸³ Mwasi na—na libala azui naino kolamuka te. Bomoni? Kolamuka moko te esili kosalema kuna te, kotalisama ya Nzambe moko te mpo na kolamusa Mwasi na libala. Bomoni? Tozali kozela nde yango sikawa. Ekosengela na baNkake nsambo wana oyo eyebanaki te kuna, mpo na kolamusa Ye lisusu, bomoni. Iyo. Akotinda yango. Alakaki yango. Sikawa bótala malamumu.

¹⁸⁴ Sikawa, mwasi yango a—akufaki. Sikawa, soki mangomba babosani bindimeli na bango, mpe ebosani biyambweli na bango, mpe bakamati Biblia, basengi ete elaka yango ékokisama, na bongo, ekozala na nguya epai na bango. Kasi, bomoni, Yesu alobaki: “Bino, na mimesano na bino, bozali kosala ete Liloba na Nzambe ézanga nguya epai na bino.” Ee, ezali ndenge moko lelo ná Eva ya molimo, bomoni, mwasi na libala ya lelo na molimo, ya maloba, lingomba. Azali koyoka Liloba na Nzambe, kasi akondima Yango te. Mpe andimi nde biyambweli, na esika na yango. Na yango, Liloba ezangi nguya epai na ye, bomoni, mpo azali koluka kokotisa bindimeli na ye ná Liloba, kasi ekosimba te. Sikawa, oyo tosengeli na yango lelo. . .

¹⁸⁵ Nazali kotánga likambo yango mbala na mbala, na zulunále oyo: *Mosakoli ya Boyei na Ye*, na nkomá ya minene ete: “Tozali na bosenga ete mosakoli moko áya! Tozali na bosenga ete mosakoli moko áya!” Mpe nabanzi ete ntango akoya mpenza, bakoyeba eloko moko te na ntina na yango. Bobebe. . . Ya solo. Ezalaka ntango nyonso bongo, bomoni. “Tosengeli na yango,” makambo nyonso oyo bozali kolobela, “tozali na bosenga ete mosakoli moko áya, mosakoli oyo akoya na Liloba ya Nkolo, oyo abangaka te. Tondimi ete Biblia elakaki yango.”

¹⁸⁶ Sikawa, nayebi Ndeko—Ndeko Moore ná bamosusu, naliaki na ndako na ye, ná makambo nyonso mosusu, mokomi na yango. Mpe ye azali moko na bato ya malamumu koleka na—na mokili mobimba, nabanzi, azali moko na bato ya malamumu koleka. Kasi, bomoni, ayebi ete tosengeli kozala na mosakoli. Mpe Ndeko mwasi Moore, moko na basi ya malamumu koleka, elenge. . . elenge mwasi, mpe bamipimelaka.

¹⁸⁷ Mpe, mpo na ngai, yango nde moko na ba-zulunále ya malamú koleka na elanga, *Mosakoli ya Boyei na Ye*. Kasi bokomona, ete bakóbaka kobelela ete: “Tosengeli na mosakoli! Tosengeli na mosakoli!” Bomoni? Oh, la la! Yango nde bazali kolobela.

¹⁸⁸ Na bongo tala biso oyo, lelo, mpe lokola lobi mpe lelo, bazali koloba na radio, ete. . . mangomba ya ba-Batiste mpe bongo na bongo, ete: “Tosengeli kosangana ná ba-Katoliko te, kasi tosengeli nde, tóloba, kozala na bondeko ná bango.” Bomoni?

¹⁸⁹ Nzokande kaka awa, Nsango ezali koteyama kaka awa, ya “Kozala mosika na mbondó wana!” Bomoni? Bomoni? “Ndenge nini bato mibale bakoki kotámbola elongo soki bayokani te?” Pole ná molili ekoki kozala na bondeko te. Soki Pole ekoti, molili ebimi. Bomoni? Ekoki te. . . Oyo ya nguya koleka! Okoki kobengana Pole na molili te. Kasi okoki kobengana molili ná Pole. Ezali ya solo. Mpe Ye azali Pole, mpe Azali Liloba. Bomoni? Sikawa, yango mpenza, ezongi sémba lisusu. Okoki kolobisa Yango lokuta te, to kosalisa Yango eloko moko mabe te. Ekozonga sémba esika yango lisusu. Iyo, mesie.

¹⁹⁰ Ndakisa, soki moto moko abandi, koluka kowelana ná yo; soki oyebi esika oyo otelemi, mpe oyebi eloko oyo ye andimaka.

¹⁹¹ Ezali lokola kozua lapin mpe kokangola ye na kati ya lopango, wana osili kokanga badusu nyonso. Telema kaka na ekuke; akozonga wana. Nde nyonso esengeli na yango. Okangeli ye na kati ya lopango. Bomoni? Akosengela kozonga lisusu na ekuke, mpo yango nde nzela bobele moko oyo akoki kobimela. Akolekisa motó na ye *awa*, penepene ábuka kingo na ye; mpe akokende ngambo *kuna*, mpe ngambo *kuna*. Telema kaka mpe tálá ye malamú, akozonga mpenza wana. Bomoni? Esili.

¹⁹² Kaka yango nde osengeli kosala. Kangama ná Liloba wana. Okoki kogánga bipai na bipai, ná bindimeli na yo, okomibuka kaka kingo bipai nyonso, kasi osengeli kozonga na Liloba oyo. Bomoni? Iyo, mesie. Nde nyonso Yango ezali.

¹⁹³ Sikawa, bomoni, ba—ba—ba—balingaka Yango te. Balingaka Liloba na Nzambe te. Mpo ye akangánaki na mimesano na ye, asalaki ete Liloba na Nzambe ékoba kozonga nguya.

¹⁹⁴ Ezali ndenge moko sikawa, mpo na Eva ya molimo. Alingi na ye te. . . Alingi kobatela mimesano na ye, mpe kokende mosika na Liloba na Nzambe. Akangami lisusu na ba-denomination, ná bindimeli na yango ná mimesano ya bampaka na ye, na esika ya kozua Liloba na Nzambe.

¹⁹⁵ Mpe ntango elaka ya Liloba, na mikolo ya nsuka, ekopésamela ye, akoboya na ye koyamba Yango, mpo na mimesano na ye, ndenge mwasi na libala ya Baebéle asalaki. Liloba ya solosolo atako etalisami polele, endimisami, etatolami, akoyamba na ye Yango te. Mpo na nini akoboya? Mpo yango nde lolenge na ye. Akoki kosala yango te. Ezali solo. Akoki

te kotelemela elilingi oyo ezali etaliseli na ye. Bomoni? Esilá kolobama liboso ete akosala yango, boye ndenge nini okomibatela na likambo nyonso?

¹⁹⁶ Sikawa likambo bobele moko ya kosala ezali ete bósepela ndenge bozali na kati. Esili. Bózala kozela yango. Malamu.

¹⁹⁷ Nzambe alakáki ete na mikolo ya nsuka, Akotalisa mpe Akotatola Liloba na Ye epai ya ye mwasi, kasi ata bongo, akosala yango te. Nzambe alakaki ye nyonso wana, na nzela na basali na Ye, basakoli. Nzambe alakaki, na nzela na Yesu Klisto. Nzambe alakaki, na nzela na Yowele. Nzambe alakaki, na nzela na Pólo. Nzambe alakaki, na nzela na Malaki. Yoane . . . Nzambe alakaki, na nzela na Yoane momonisi, basakoli nyonso wana, mpenza oyo Nsango ya nsuka ekozala epai na ye. Sikawa, soki bolingi kokoma yango; na ntembe te, bino nyonso boyebi yango: Yesu, na Yoane 14:12; mpe Yoele, na Yoele 2:38; Polo, Timote ya Mibale 3; Malaki, mokapo ya 4; mpe Yoane momonisi, Emoniseli 10, zomi na nsambo, moko kino zomi na nsambo. Bomoni, makambo oyo ekosalema mpenza sikawa! Kasi, mpo na lingomba, Ezali eloko nini? Liloba oyo eláti nzoto ekómaki lisusu mosuni katikati na libota na Ye! Bomoni? Kasi bazali kaka kondima Yango te.

¹⁹⁸ Boyebi eloko oyo Yesu alobaki ntango Amonaki ete A . . . ntango Asalaki bikamwa wana liboso na bango, mpe Atalisaki polele ete Azalaki Nzambe? Atalisaki yango polele, eloko oyo Azalaki kosala. Azalaki yango. Asalaki yango mpenza. A—Alobaki na bango, Alobaki: “Oh, yo, Kapernaume, oyo omitomboli kino na likoló, soki misala oyo esalemaki . . . misala ya nguya oyo esalemaki epai na yo ésalemaka na Sodoma, elingaki kotikala kino lelo.” Ezali solo. Mpe na Kapernaume, Ye atikalá kosala eloko te, bobele kobikisa ndambo ya bato, mpe ayebisaki bango basekele ya mitema na bango, mpe akendeki na ye. Ah-ha. Esili wana. Bomoni?

¹⁹⁹ Bayebi na bango te oyo misala ya nguya ezali. Bakanisaka ete esengeli kozala manáka moko ya makambo minene, esika oyo bato nyonso batelemaka, mpe zúzi abetaka lísikúlu, ná—ná mizíki kobéta, mpe babendele kotepa-tepa, ná ba—ná basi oyo balati kitoko, ná . . . mpe bazali kozela, mpe ba—Docteur nyonso ya Philosophie ná ba—Docteur ya Droit balati bikoti minene, ya milai, ná bakingo ya bilamba ebaluká, mpe nyonso wana, bango nyonso basengeli kokota. “Wana ezali eloko moko ya monene.”

Nzambe alobi: “Wana ezali boléma.”

²⁰⁰ Kasi Atelemisi mwa moto moko ya mpamba, oyo ntango mosusu ayebi mpenza bokeseni te na ABC, mpo na kosala likambo oyo ekopelisa mpenza móto na Lingomba ya solosolo. Mpe bamosusu na bango balobaka: “Etóngá ya ba-túntuki.” Nzambe abengaka *Yango* “monene,” kasi mokili ebengaka *Yango* “boléma.” Mokili ebengaka *Yango* “monene,” kasi Nzambe abengaka yango “boléma.” Bomoni, bokeseni mpenza. Bomoni?

Mpe likambo oyo Nzambe alakaki, Nzambe akosala yango mpe asili kosala yango. Bomoni? Tokómi nde wana.

²⁰¹ Sikawa, kino lelo, azali kaka ndenge azalaki, Eva ya Baebete. Andimaki na ye yango te. Okokaki kosekwiwa bakufi; okokaki komona Molimo ya Nzambe. Yesu ayaki awa, Ye moko atatulaki ete azali Mwana na Nzambe. Liboso, Abandaki koteya. Ee, bango bakanisaki: “Ee, Azali lokola Moto moko ya ndenge. Azali mpenza Nani, ata bongo?” Ee, na mbala moko, bato babandaki koloba . . .

²⁰² Na ntembe te, liboso balobáká, ntango mobongisi-nzela na Ye ayaki, Yoane, batunáki ye: “Yo nde Masiya?”

²⁰³ Alobaki: “Te. Kasi Azali katikati na bino, esika moko boye.” Ah-ha. Bomoni? Mpo na nini? Ayebaki oyo asengelaki kosala, ntango nsango na ye ekokóma. Ayebaki eloko oyo akosala.

²⁰⁴ Kaka ndenge Noa akóbaki kolandela Enoka. Ntango Enoka akendeki, Noa alobaki: “Malamu tópusana penepene na masuwa. Ntango yango ekómi pene.” Noa akobaki kolandela Enoka. Bomoni?

²⁰⁵ Mpe Yoane azalaki kolandela elembo oyo Yesu ayebisáká ye, to oyo Nzambe ayebisáká ye, álandela. Alobaki: “Azali awa sikawa, esika moko katikati na bino. Nayebi Ye te, kasi nakoyeba Ye.”

²⁰⁶ Etelemaki ye wana, batunaki ye: “Yo nde Masiya, boye te?” Balobaki: “Quartier général nde etindi biso.” Ah-ha. Balobaki: “Bampaka ná bango nyonso nde batindi biso awa. Soki yo ozali Masiya, mpo na nini oyei te mpe omimonisi polele kuna, ezali te koya awa, epai ya bato ya mpamba oyo! Osengeli kokende kuna mpe komimonisa polele.”

²⁰⁷ Alobaki: “Nazali Masiya te.” Alobaki: “Nazali mongongo na ye oyo azali kogánga na lisobe.”

²⁰⁸ Oyo wana elekaki bango mosika mpenza likoló ya motó. Bayebaki ata eloko moko te na ntina na yango, bomoni, na ntango oyo bango nyonso bazalaki kozela ye áya. “Kasi ekokaki kozala moto lokola ye te. Oh, la la, wana ekozala nsómo!”

“Otángá na eteyelo nini?”

“Na eteyelo moko te.”

“Ozali na kálati na yo ya lingomba?”

“Ezali nini?” Bomoni?

²⁰⁹ Apakolamaki na Nzambe. Alobaki: “Nazali na eloko kaka moko. Epasola etiami na mosisa ya nzete.” Sikawa, yango nde nyonso oyo a—yango nde nyonso oyo azalaki na yango. Azalaki koloba na elobeli ya mokáti-nzete, na elobeli ya bakonzi ya mangomba te; bitupa, bipasola, banzete, mpe bongo na bongo. A—azalaki koloba na elobeli ya bakonzi ya mangomba te.

210 Kasi Yesu alobaki etikálá kozala na mosakoli moko te lokola ye. “Ata moto moko te atikálá kobotáma na mwasi lokola ye, kino mokolo na ye.” Ya solo. “Azalaki koleka mosakoli.” Azalaki motindami ya Boyokani, azalaki mpenza na katikati ya—ya bantango mibale, koyaká. Bomoni? “Koleka mosakoli.”

211 Na bongo—na bongo, bayebaki ye te. Basosolaki ye te. Azalaki moto moko ya ndenge, boye babwakisaki ye, bomoni.

212 Boye ntango Yesu ayaki, na bongo, mpe na ntembe te, balingaki koyamba Ye te, Mwana ya mosali-mabaya oyo, moto ya ndenge wana azalaki te, ná lokumu mabe kolanda Ye, ya “mwana makángo.” Mpe, Ye, balingaki komona Moto ya ndenge wana te.

213 Kasi, kasi bóতাala eloko oyo Nzambe asalaki. Azuaki bato oyo batángá te, babóla, balobi-mbisi, bakáti-nzete, basáli bilanga, ná basi ya ndumba, mpe Atikaki bato ya lokumu bázala kuna. Mpo na nini? Eloko nini? Mpo na nini Asalaki yango? Mpo na nini Asalaki likambo ya ndenge wana? Bokoki kobanza yango? Mpo bato yango basósolaki ete Azalaki Liloba. Sikawa, tólandela bango mwa moke.

214 Tala mobange molóbi-mbisi wana, moínga, ayebi ata kokoma nkombo na ye te. Biblia elobi ete azalaki “moínga mpe atángá te.” Ayei ná mbisi na ye mpe akitisi yango wana. Akei kuna kotala ntina ya makelele mingi nyonso wana. Kasi na kati na ye mpenza, ayebaki ete Biblia elobaki ete Masiya . . . Baebele nyonso bazalaki kozela Masiya, mpo likambo moko ya Makomi esengelaki kosalema ntango Akoya.

215 Ba-masiya ebele basilaki koya, batelemaki mpo na koloba: “Ezali nde Ngai,” mpe bamemaki bango libanda na nzela, bato nkama na nkama, mpe—mpe bakufaki ná nyonso wana. Kasi, bomoni, wana ezalaki mpo na komema bato mosika na Oyo ya solosolo, ntango Ekoya.

216 Tosílá komona bato na mikóto ná bakazaka ya Eliya, ná makambo mosusu ya ndenge na ndenge, kasi e—ezali—ezali—ezali kaka mpo na komema bato mosika na likambo ya solosolo ntango akoya mpenza. Bomoni? Ya solo. Bato ya ndenge na ndenge oyo balataki banzambala ná bilamba, mpe bakundamaki na banzambala ya ndenge na ndenge oyo babalóli, ná nyonso wana. Yango te nde e . . . Yango—yango ezali kaka kotatola. Ndakisa, dollar ya lokuta, elakisaka ete oyo ya malamuzali ezali esika moko boye, soki bokoki komona yango. Bomoni?

217 Boye, tala Ayaki. Sikawa bato ya lokumu yango bayaki wana, kasi bakangamaki makasi na makambo na bango mosusu! “Ee,” balobaki, “sikawa, soki Masiya ayei, na ntembe te, Akoya epai ya Kaifa. Akoya na denomination na biso. Akoya epai ya Bafalisai.” Basadukai: “Oyo wana nde bino bokanisaka! Akoya nde epai ya Basadukai.” Mpe bazalaki wana, bomoni, bazali na likambo yango moko lelo, sikawa.

218 Kasi ntango Ayaki, ezalaki ndenge. Akoya, oh, na kokesene mpenza na oyo bango bazalaki kokanisa, kasi Ayaki kokokana na Liloba. Kasi bango bayebaki Liloba te.

219 Bótika náloba yango mpenza, mpo bó...mpo ékota na bozindo mpenza. Nalingi likambo oyo ésosolama malamumu. Yango nde likambo ná bino lelo, bomoni, boyebi Liloba te! Bomoni?

220 Yesu alobaki: “Bokoki kosósola ndenge likoló ezalaka, kasi bilembo ya ntango, bozokoka kososola yango te.”

Balobaki: “Biso tozali na Mose.”

221 Na bongo, Alobaki: “Soki bóyebaka Mose, bolingaki koyeba Ngai.” Bayebaki Mose te, yango wana bayebaki te. Bayebi kaka bindimeli epai baútá, lokola soso oyo abimá na líki.

222 Sikawa tózua mobange molóbi-mbisi yango. Akitisi kitúnga na ye. Abendi mandefu na ye ya mpembe, mpe apusani: “Nabanzi nakokende komona soki ezali Nani.”

223 Ndeko na ye alobaki: “Yaka. Tókende kuna.” Alobaki: “Ezali Moto moko wana. Ezali Moto wana oyo balobelaki mokolo mosusu wana...Natikalaki mpokwa mobimba ná Ye elongo, lobi na mpokwa. Oyebe Yoane, nazalaki kosolola na yo na ntina na likambo yango?”

224 “Iyo, moto ya zamba wana oyo azalaka kuna! Iyo, nayokaki nsango na ye.” “Ee,” mobange Simona, boyebi, alobaki, “nayokaki nsango na ye na nse kuna. Iyo, azali kuna na nsé, eleki sanza mibale to misato, oyo azali kuna. Iyo.”

225 “Ee, alobaki...Mpe mokolo moko azalaki wana, alobaki likambo moko ya ndenge. Alobaki: ‘Boyebi, Ye wana Azali koya sikawa!’ Balobaki: ‘Oyebe yango ndenge nini?’ Atalaki kuna; Moto moko lokola bato nyonso azalaki wana. Alobaki: ‘Namoni Molimo ya Nzambe kokita, lokola ebengá. Nayoki Mongongo koloba: ‘Oyo ezali Ye. Oyo nde Mwana na Ngai ya bolingo, oyo Nasepeli kofanda kati na Ye.’” Na bongo akotaki mbala moko na mai, abatisaki Ye, mpe bongo na bongo. Ee, na ntango yango nde alobaki ete ayebaki Ye.”

226 “Oh, nayebi te,” Simona alobaki. “Nasila koyoka nyonso wana, mbala mingi.” Kasi ye wana apusani. Kasi na nsé ya motema na ye, azalaki momboto oyo ebongisamáka liboso. Bomoni? Yesu nde alobaki bongo. Ya solo. Apusani mpembeni na Ye. Apusani. Amilobelaki: “Nakokende na liyangani yango mpo námona.” Apusani wana.

227 Yesu atelemaki wana, mwa Moto moko lokola bato nyonso. Apusanaki. Alobaki: “Ee, nkombo na yo Simona. Mpe tata na yo, nkombo na ye ezalaki Yona.” Ebimisaki ye mopepe. Mpo nini? Ebetaki mwa momboto wana ya Bomoi na Seko oyo ezalaki kuna na kati. Iyo, mesie.

228 Alobaki: “Zela naino! Ezali ndenge nini? Omóná ngai naino te. Mpe Oyebeke tata na ngai te, mpo asilá kokúfa eleki mibu

ebele. Kasi awa Outi koyebisa ngai makambo yango? Sikawa, nayebi ete Biblia elobi . . .” Sikawa, wana ezali te kozonga na oyo mpaka alobi. “Kasi Biblia elobi ete Masiya akozala Mosakoli. Ye wana. Ezali Ye.”

229 Mokolo moko Alekelaki na Samalia, kolekeláká kuna elongo ná etonga ya Bayuda. Atikaki bango. Mpe elenge mwasi oyo, ya bomoi mabe, ayaki wana, ntango mosusu azalaki elenge mwasi moko kitoko, boyebi. Mpe babenganáká ye, akómáká kofanda na balabala, ntango azalaki mwana moke. Mpe azalaki kolekela wana. Ntango mosusu azalaki kokanisa likambo moko. Apusanaki wana mpe akitisaki katini. Mpe abandaki kokitisa etókeli, boyebi, mpo na kotóka mai. Mpe ayokaki Mobali moko koloba: “Memela Ngai mai ya komela.” Atali nzinganizinga, mpe elenge Moyuda moko afandaki wana.

230 Alobaki: “Tala, Ozali Moyuda, boye te? Osengelaki kosala bongo te. Kokokana na bonkoko, Okoki kosolola ná ngai te. Nazali Mosamalia.”

231 Alobaki: “Kasi soki óyebaka Nani oyo ozali kosolola ná Ye, yo nde olingaki . . . olingaki kosenga Ngai mai ya komela.”

232 Alobaki: “Wapi mbéki na Yo?” Bomoni? “Wapi nsinga na Yo?”

“Ee,” Alobaki, “Mai oyo Ngai napesaka ezali Bomoi.”

233 “Nini?” Bomoni? “Ee,” alobaki, “ee, bino nyonso bolingaka kosám-bela na Yelusaleme. Kasi batata na biso bazalaki kosám-bela . . .”

234 “Oh,” Alobaki, “ezali solo, kasi,” alobaki, “bisó Bayuda toyebi oyo tosám-belaka. Kasi,” Alobaki, “oyebi, ntango ezali koya, oyo—oyo bato bakosám-bela Yelusaleme te, to na ngomba oyo te.” Alobaki: “Bako—bakosám-bela Nzambe na Molimo, mpamba te Azali Molimo, Molimo mpe Solo.” Ee, abandaki kokanisa, boyebi.

Mpe Alobaki: “Kende kozua mobali na yo mpe yaka awa.”

Alobaki: “Mobali na ngai? Nazali na ngai na mobali te.”

235 “Ee,” Alobaki, “ezali solo.” Ye alobaki, alobaki: “Obimaka na mibali mitano, mpe okómi na oyo ya motoba sikawa.” Mpe Alobaki: “Ozalaki na bango mitano. Mpe—mpe, yo, oyebi. Olobi solo.”

236 Bótala malamú! Ezalaki nini? Pole ebétaki momboto wana. Esiláká kozala wana, elobamáká na Nzambe. Iyo, mesie.

237 Momboto yango ezalaki na mabelé. Ntango Nzambe alongólaki mai, mpe moi ebetaki yango, ebimaki. Ya solo. Bomoni? Yango nde nyonso oyo esengelaki na yango, moi. Esengelaki kaka na pole. Iyo, mesie.

238 Na bongo, ntango Molimo Mosanto, kati na Ye, ezipolaki bomoi na ye ya kala, mpe etalisaki ye yango, Pole ebetaki yango.

Alobaki: “Mesie, namoni ete Ozali Mosakoli.” Alobaki: “Sikawa, toyebi, nayebi yango, ete ntango Masiya akoya, nde oyo wana Ye akozala. Mpe tozuaki mosakoli te, eleki mibu nkama na nkama. Totikali kozala na mosakoli ya solo ata mokolo moko te, eumeli mibu nkama na nkama.” Mpe alobaki: “Ndenge nini Olobeli ngai na ntina na mobali na ngai, mpe Olobeli ngai mibali boni nasila kozala na bango, mpe bongo na bongo. Ee,” alobaki, “nazosósola yango te.” Alobaki: “Ntango Masiya akoya, ee, Ye akosala yango. Kasi Yo ozali Nani?”

Alobaki: “Nazali Ye.”

Yango ekataki likambo. Bomoni? Mwasi ya ndumba!

²³⁹ Kasi banganganzambe bazalaki kotala nzinganzinga mpe koloba. . . Ee, basengeli kopesa biyano na eyanganelo na bango. Bazalaki koloba: “Bókipaka moto wana te. A—akonzami na molimo mabe. Nde nyonso wana.” Sikawa, yango nde bokeseni. Ezali ndenge moko lelo. Bomoni? Ndenge moko lelo, ekokani mpenza. Iyo. Iyo, mesie.

²⁴⁰ Ye, ye ayebaki yango, mpo Pole ebetaki Yango. Bango ba- . . . Balóbi-mbisi yango, bakáti-nzete, basáli-bilanga, bakongoli-mpako, basi ya ndumba, bamonaki kati na Ye eloko oyo Makomi ya komikitisa elobaki ete Akosala. Kasi Bafalisai bakokaki komona te, likoló ya mimesano na bango. . . ? . . . Bakokaki komona te, likoló na mimesano na bango. Kasi mwasi na ndumba, basáli-bilanga, ná bango nyonso, bamonaki Yango, nyonso oyo abongisámáká liboso. Ntango ntembe elongwaki, momboto ebandaki kokóla. Ya solo.

²⁴¹ Asalaki nini? Alobaki: “Ee, nazali na esengo ndenge nakutanaki na Masiya”? Oh, te, ndeko. Akendeki mbala moko na engumba. Abosanaki mai. Alobaki: “Bóya komona Moto Oyo ayebisi ngai makambo oyo nasilá kosálá. Ezali likambo mpenza oyo Makomi elobaka ete Masiya akosala, boye te? Ezali mpenza yango, boye te?” Mpe bato bakokaki komona likambo yango moko.

²⁴² Ndenge Yesu Klisto alobaki, na Santu Yoane 14:12, ekosalema lisusu. Alobaki yango mpe na Luka, ntango Alobaki: “Ndenge ezalaki na mikolo ya Noa.” Ndenge Nzambe amitalisaki Ye moko kati na Moto moko, mpe alobaki nani azalaki nsima na Ye; ná oyo Sara asalaki, asekaki na kati ya hema. Mpe Makomi nyonso oyo, ya Malaki, mpe bongo na bongo, elobaki liboso na mikolo ya nsuka. Baebele 4 elobi: ntango “Liloba” ekoya lisusu. Malaki 4 elobi ete Ekoya lisusu na nzela ya moto moko. Baebele 4 elobi: “Liloba na Nzambe esósolaka makanisi oyo ezali na kati ya motema.”

²⁴³ Mpe bakoki komona yango kokokisama, kasi bazali mpenza kopesa yango mokongo. Mimesano na bango ezali kobomba yango mpe kosala ete ézanga nguya. Ee, tokómi mpenza wana. Esili. Ah-ha.

²⁴⁴ Boyebi, Akoki kosala likambo yango moko lelo. Akoki koya mpenza awa mpe kosala makambo yango moko oyo Asalaki na ntango wana, ndenge Alobaki ete Akosala. Bomoni? Alakaki kosala yango. Alakaki kosala yango. Mpe soki Akosala likambo yango moko, motindami na Laodikia nde asengeli kosala yango.

²⁴⁵ Na bongo, soki lingomba ya Laodikia bamoni yango kokokisama, bakosala kaka mpenza ndenge lingomba ya Baebele esalaki na ebandeli. Um-hum. Ata Etatolami malamumu ndenge nini, oh, bakosala yango, ata bongo. Oh, la la!

²⁴⁶ Sikawa, Elobi ete ekosalema bongo. Ete tokozonga na Liloba ya ebandeli, mpe tokotalisama ndenge elakamaki, mpo na kozongisa lisusu Kondima, Kondima ya ebandeli, lisusu. Mpe soki Amitalisaki polele ete Azalaki kofanda katikati na libota na Ye, na kosaláká makambo oyo; Akokaki kutu kosala ete bázua fotó na Ye, kotalisa yango polele na ndenge ya science. Kasi ata bongo bazondima na bango yango te. Mpe etalisami polele, Apesaki nzela ete liso ya masini ézua Ye wana Atelemaki wana, Likonzi na Móto moko wana, motindo moko lobi, lelo, mpe libela, Baebele 13:8, mpo na kolakisa ete e—ezali na nzela na science, mpe banzela mosusu ya ndenge na ndenge, na ndenge ya science, na misánda ya molimo. E—ekoki kotatolama na ndenge nyonso oyo esili kotatolama.

²⁴⁷ Kasi, boyebi, ntango mosusu bakosala ndenge moko. Ntango mosusu bakopesa yango kaka mokongo mpe bakosala likambo moko, kaka ndenge basalaki.

²⁴⁸ Oh, Nzambe sunga biso! Oh! Tokotelema kaka awa. Kasi, Nzambe ázunga biso komona sikawa, nde libondeli na ngai, wana tozali koya sikawa. Mpamba te, nalingi koumisa bino ntango molai koleka te. Nzambe ázunga biso komona. Nandimi ntango mosusu, wana Molimo ezali likoló na biso, ekozala malamumu sikawa ete Ázunga biso komonisa, kofungola Elembo oyo.

²⁴⁹ Tótanga. Wana tozali komona lolenge lingomba ekómi kati na yango, tozali komona epai ekómi, tomoni makambo oyo basalaki, tomoni epai esengelaki kokóma, komona yango wana, mpe tozali komona makambo oyo basengelaki kosala. Basali yango mpenza. Sikawa bozali komona epai tokómi? Bino nde bókata likambo. Ngai nakoki kokata likambo te. Ngai nazali bobele na mokumba ya koteya Liloba oyo. Kaka ndenge Epesameli ngai, nakoki kopesa Yango. Kino Épesamelá ngai, nakoki kopesa Yango te; moto mosusu te akoki kosala yango.

Wana ekangolaki ye elembo na misato, nayoki ejalina-bomoi na misato koloba ete, Yaka komona. Natali, mpe namoni mpunda ya moindo; mpe ye oyo afandi na yango ajalaki na kiló na loboko na ye.

Nayoki mongongo lokola katikati na bijali-na-bomoi minei koloba ete: Kopo moko ya blé denali moko, kopo

*misato ya loso denali moko; kasi bébisa mafuta ná . . .
vinyo mpe te.*

²⁵⁰ Sikawa, Mwana-mpate asimbi Buku na loboko na Ye, azali kobuka Bilembo. Abukaki oyo ya liboso, ya mibale, mpe sikawa Abuki oyo ya misato. Mpe wana Abuki yango, Mwana-mpate abuki yango, Elembo ya Misato, Ezali na bomoi ya misato . . .

²⁵¹ Sikawa bato boni bayebi ndenge Ezali-na-bomoi ya misato azalaki? Azalaki lokola moto. Oyo ya liboso azalaki lokola nkosi; oyo ya mibale azalaki lokola mwana-ngombe, to ngombe mobali; mpe oyo ya misato azalaki lokola moto, ezalaki moto. Mpe ayokaki e—Ekelamo na bomoi, e—Ezàli-na-bomoi. Ekelamo na bomoi oyo azalaki lokola moto, alobaki na Yoane: “Yaka komona oyo Yango ezali, libombami oyo ebombamaki.” Kati na mibu nyonso ya lisiko, longwa na kozalisama ya mokili, Ebombamaki na nsé ya Elembo oyo, likambo oyo ekosalema. Sikawa: “Yaka, kotala oyo Yango ezali.”

²⁵² Na boye Afungoli Yango. Nkake engulumi, mpe Mwana-mpate afungoli Bilembo yango.

²⁵³ Sikawa, mpe Yoane apusanaki, mpo na komona oyo Yango ekozala. Amonaki eloko nini? Amonaki mpunda ya moindo. Mpe mobuti na yango asimbaki emekeli, to emekeli-kilo, na loboko. Sikawa, yango nde eloko ya liboso oyo amonaki. Ntango Mwana-mpate ayebisaki Yango, ntango abukaki Elembo yango, na bongo Ezali-na-bomoi mosusu. . . Bomoni, Bizàli-na-bomoi yango bazali kopesa mayebisi moko nsima na mosusu: “Yaka, komona.” Mpe Yoane, esika atelemaki, ntango mosusu *boye*, apusani awa, ntango Mwana-mpate afungolaki, mpe apusanaki. Na momesano . . .

²⁵⁴ Nkake engulumi, wana tomonaki na Elembo ya Liboso. Mpe atalaki malamumu mpo na komona eloko oyo ekosalema. Mpe amoni moto moko koya, liboso, likoló na mpunda ya mpembe. Mpe amoni ye kobuta na mpunda. Mpe kino na nsuka, Yoane amoni ye kino na nsuka. Amoni ye koya, mpunda na ye ya mpembe, asimbi litimbó na loboko na ye, mo—mobuti na yango, kasi azali na mbanzi ná yango te. Mpe likambo ya kolanda oyo amoni, ezali ete azui motóle, mpe akobi kobuta na mpunda kino na nsuka.

²⁵⁵ Bongo tomoni, na nsima, ete Mwana mpate ayei lisusu, Afungoli oyo mosusu. Mpe atali. Sikawa mpunda ya—ya motane nde eyei. Moto yango asimbi mopanga na loboko. Atamboli mpenza kati na Makomi mobimba, bomoni, ná mopanga yango na loboko, mpe asengelaki koboma mpe kolongola kimia na mokili.

²⁵⁶ Sikawa Mwana-mpate afungoli Elembo mosusu. Moko na Bikelamo na bomoi, oyo azalaki lokola moto, alobaki: “Yaka, komona.” Sikawa apusani, amoni oyo yango ezali. Nsima na yango, mobuti-mpunda moko ayei likoló na mpunda ya moindo.

257 Sikawa, lobi na mpokwa, tomonaki ete mobuti-mpunda moko yango, oyo azalaki na mpunda ya mpembe, azalaki moto yango moko likoló na oyo ya motane.

258 Mpe Mongongo elobaki, na katikati na Bizàli-na-bomoi, ebelelaki, bomoni. Akendeki komona oyo yango ezalaki kuna: Azalaki kati na Bikelamu na bomoi yango. Mpe amonaki mpunda ya moindo oyo.

Mpe ntango...mongongo kati na bizàli-na-bomoi minei ebelelaki ete, Kopo moko na blé denali moko, mpe—mpe kopo misato na loso denali moko; kasi bebisa ma—mafuta, ná vinyo mpe te. (Bomoni?)

259 Mobuti-mpunda oyo, tólobela ye naino. Soki botali, mobuti-mpunda ya liboso, oyo ye azalaki. Mpe tomonaki, lobi na mpokwa, kokokana na Makomi, ete mobuti-mpunda ya mibale azalaki kaka moto yango moko, azalaki kaka likoló na mpunda mosusu. Likambo nini esalemaki? Abongolaki lotomo na ye. Bomoni? Ya solo. Tomonaki ete azalaki motemeli-na-Klisto, mpe abóngolaki esika na ye.

260 Tomonaki ete ntango ye, liboso, azalaki kaka mpunda ya mpembe, akómaki mateyo. Sikawa, tosili kotalisa moko na moko na bango mpenza na Makomi. Bomoni?

261 Sikawa, bótala malamumu epai tokómi, na mpokwa oyo, na eleko ya lingomba mosusu wana sikawa. Bomoni? Tokómi na eleko ya lingomba ya misato sikawa. Bomoni? Ndenge wana mpenza, eleko ya lingomba ya misato ezali mpenza lokola mpunda ya misato. Bomoni?

262 Sikawa, eleko ya lingomba ya liboso, ezalaki nini? Banikolaiti bazalaki na mateyo moko, bomoni, yango nde oyo ya liboso. Malamumu. Na nsima, na mbala moko, mateyo ya Banikolaiti oyo endimamaki ete ezalaki malamumu, ekotaki na mosala. Mpe balatisaki moto yango motóle. Na nsima, molimo yango, motemeli-na-Klisto alataki nzoto kati na moto. Bomoni? Mpe tomonaki ete, na nsima, akómi mpe zabolo oyo alati nzoto; molimo mabe akei, mpe zabolo akoti.

263 Mpe kaka ndenge lingomba yango ezali, lolenge wana, lingomba ya motemeli-na-Klisto, ezali kokende liboso, Mwasi na libala mpe aleki ná makambo ya ndenge na ndenge: na nzela ya kolóngisama, kobulisama, libatizi ya Molimo Mosanto, mpe azali kokende liboso, bomoni, kaka ndenge wana. Bebele nde bango bazuaki kolamuka na bango liboso, mpe Lingomba ezali kozua yango na nsuka. Mibu misato na bango ya liboso... bitape misato na bango ya liboso oyo elekaki kati na eleko ya molili; na nsima oyo ya misato, bitape misato, Lingomba ebimi: longwa na kolóngisama, kobulisama, libatizi ya Molimo Mosanto, kino na: *Nzambe oyo alati nzoto*, oyo atalisami katikati na biso. Ye wana akoti, lokola motemeli-na-Klisto, lokola mosakoli ya lokuta, nsima lokoka nyama, bongo na eleko ya molili. Mpe Lingomba

ebimi na eleko ya molili yango: kolóngisama, kobulisama, libatisi ya Molimo Mosanto: *Mondimi ya Liloba Lilati Nzoto*. Mpe akiti. Ah-ha. Bomoni yango? Ye akiti. Lingomba emati. Bomoni? Ebongi mpenza be. Oh, ezali kitoko. Nalingi yango mingi.

²⁶⁴ Mobuti-mpunda oyo, ezali kaka ye moko, kasi na etape mosusu ya lotomo na ye.

²⁶⁵ Na étape ya liboso, mpunda ya mpembe, bomoni, azalaki kaka molakisi, kaka molakisi ya motemeli-na-Klisto. Azalaki kotelemela Liloba na Nzambe.

²⁶⁶ Sikawa, ndenge nini moto akoki kozala motemeli-na-Klisto? Moto nyonso oyo awánganaka ete Liloba moko na moko ya oyo ezali solo te, mpe esengeli koteyama mpenza ndenge moko, azali motemeli-na-Klisto, mpo bazali kowángana li—li—li—li—Liloba. Mpe Ye azali Liloba.

²⁶⁷ Sikawa, na étape ya liboso, mpunda ya mpembe, azalaki kaka molakisi, kasi molimo ya motemeli-na-Klisto ezalaki na kati ya mateyo ná makoki na ye. Ezalaki kosala mabe te. Ezalaki komónana lokola ekokaki kosala mabe moko te; kaka kokende liboso. Lolenge wana nde Satana akótaka. Oh, azalaka na mayele mabe.

²⁶⁸ Ayebisaki Eva, alobaki: “Sikawa, oyebi ete ozali koluka bwanya. Oyebi malamú ná mabe te.” Alobaki: “Sikawa, soki miso na yo ézalaka ya kofungwama, olingaki koyeba yango.” Mpe alobaki: “Mbuma yango ezali kitoko mingi. Ezali malamú. Ezali—ezali kitoko na miso. Osengeli kozua yango sikawa. Oyebi te soki ezali malamú, to te, boye te?”

“Te, nayebi te. Kasi Nzambe alobaki ete tósala yango te.”

“Kasi, oh, ee, nayebi, kasi. . .”

“Nzambe alobaki ete A. . . tokokufa.”

²⁶⁹ Alobaki: “Na ntembe te, Akosala yango te.” Bomoni, na bopolo nyonso mpenza. Bótala oyo yango esalaki.

²⁷⁰ Bótala malamú ndenge molimo ya motemeli-na-Klisto yango etelemaki na lingomba ya ebandeli, mateyo ya Banikolaiti. *Nikao*, “kokonza” bandimi, kosala moto mosantu moko. Oh, ezali mpenza lokola ezan- . . . “Ee, tozali bobele na mposa ya bondeko. Ee, bopalangani mingi awa; moto moko te ayebi epai mosusu azali. Nakanisi ete biso nyonso tosengelaki kosala ebongiseli moko mpe kozala mpenza ndenge mosusu. Bomoni, tokende kosangana. Tosengelaki kosala loge moko.” Mpe wana nde oyo yango ezali. Lingomba ya Baklisto ya Metodiste ezalaka te. Oyo wana ezali Lingomba te; oyo wana ezali loge. Batiste, ezali Lingomba te; ezali loge.

²⁷¹ Lingomba ezali bobele moko, ezali nde Nzoto ya Yesu Klisto oyo emonanaka te. Mpe babótamaka kati na Yango, ya solo, na nzela na kobongisama liboso. Ya solo. “Baoyo nyonso Tata apésá

Ngai bakoya. Moto moko te akoki koya soki Tata abengi ye te. Mpe baoyo nyonso Ye apési Ngai, bakoya epai na Ngai.” Boye, wana, yango nde. Ye. . .

²⁷² Mwana-mpate afandi wana, Azali ko—kolobela bato, kino ntango oyo ya nsuka ákota. Bongo mwa ngonga ebeti, mpe Akoya kozua libula na Ye, bomoni, esili; Akomema Lingomba na Ye na Ndako, bato na Ye. Mpe Akobwaka moyini na Ye na Láki ya Móto, mpe bato na ye nyonso bakokende kuna elongo ná ye, mpe esili. Na nsima nde tokokóta na Millénium.

²⁷³ Mobuti-mpunda moko wana, sikawa. Na etape oyo ya liboso, azalaki na mabe moko te. Na oyo ya mibale, soki bomati mwa moke likoló, ekómi mwa monene koleka; na etápe ya mibale, Biblia elobi ete “motóle moko epesamelaki ye.” Mpe balatisaki moto moko motóle, elombe mobali. Bomoni, balatisaki ye motóle! Mpe, kasi Biblia ebengi ye pápa te. Biblia ebengi ye “mosakoli ya lokuta.” Mpo na nini? Iyo. Na ntembe te, asengelaki kozala mosakoli ya lokuta, na molimo na ye ya motemeli-na-Klisto, oyo ezalaki koteya kotelemela-Klisto, esongó na Liloba ya ebandeli. Mpamba te, soki azalaki koteya kotelemela Liloba ya ebandeli, ezalaki motemeli-na-Klisto. Ezalaki bongo. Mpe Liloba ezali Nzambe, bomoni, Klisto. Malamu. Sikawa, nsima na yango, tomoni ete balatisi ye motóle. Mpe ntango balatisaki ye motóle, sikawa, azali na mabe te mpenza, mpe lisungi moko te. Azali kaka mwa moto moko boye.

²⁷⁴ Kasi na nsima, na Likita ya Nicée, bakómisaki ye bongo, mpe Constantin apesaki ye nyonso. Na bongo asalaki nini? Na bongo ye, bomoni, Satana apesaki ye ngwende ná bokonzi na ye. Biblia nde elobaki bongo, ndenge toyekolaki yango.

²⁷⁵ Sikawa, likambo mosusu oyo tomoni ezali ete zabolo nde akonzaka politiki nyonso oyo esilá kozala to ekozaláká. Tomoni yango na Matai 4:11. Sikawa tomoni lisusu ete Satana asilaki kozua politiki.

²⁷⁶ Kasi azali nde koluka kozua Lingomba, na bongo akiti kuna mpo na kopengwisa Yango. Azui elombe na ye, apesi ye esika na kati ya ebongiseli, mpe alatisi ye motóle ya “mokitani,” bomoni, klisto moko. Klisto azalaki kosala na esika ya Nzambe. Bomoni, moto yango azali mokitani, na esika ya Nzambe. Bomoni? Ndenge moko, “na esika ya Nzambe,” yango nde asengeli kozala, mokitani na nsé ya Klisto.

²⁷⁷ Sikawa, sikawa, ntango asalaki bongo, na nsima asalaki nini? Ye, Satana azuaki nguya na ye ya politiki, oyo asilaki kozala na yango, mpe azuaki nguya ya religion, elingi koloba asilaki kolata motóle, mpe asangisaki yango esika moko.

²⁷⁸ Na nsima, asalelaki ye motóle mosusu lokola mokonzi ya ewélo. Mpo na baoyo basilaki kokufa, soki bafuteli bango mbongo ya kokoka, ye akobimisa bango kuna. Bomoni? Na ntango yango, akómi—akómi mokitani mokonzi ya Lola,

mokonzi ya epóngelo, ndenge alingaka kobenga yango. Na Biblia, eloko ya ndenge wana ezali te, bomoni, kasi asengelaki kosala likambo moko. Biblia elobi ete eutaki na libulu mozindo, mpe ekozonga kuna ndenge moko. Mpe, na mokili, azali moyangeli!

²⁷⁹ Sikawa, bapesaki ye eloko nini na nsima? Liboso, azalaki na litimbó, kasi azalaki na mbanzi te. Kasi sikawa asimbi mopanga ya nguya na loboko na ye. Akoki sikawa kosala likambo moko. Na bongo akiti mbangu na mpunda na ye ya mpembe; mpunda ya mpembe ekobi mpe elimwe. Sikawa amati likoló na nini? Na mpunda ya motane, makila, mpunda motane ya makila. Abuti mpenza oyo wana. Oh, ya solo. Sikawa apesami nguya monene ná mopanga monene, mpo na koboma, na bongo abuti na mpunda na ye ya motane ya makila.

²⁸⁰ Tomonaki, na Elembo ya Mibale, oyo ebukamaki lobi na mpokwa, ete asilaki kolongola kimia na mokili mpe bato bakómaki kobomana. Mpe liste na ye moko ya martyr, ya lingomba Katoliko ya Roma, elobi ete babomaki ba-Protestant milió nkóto ntuku motoba na mwambe, kobanda na ntango ya Santu Hippone ya . . . nsima na Santu Augustin ya Hippone, kino na mobu nkóto moko na nkama mitano na ntuku mwambe. “milió ntuku motoba na mwambe.” Ekomami na *Reforme Monene*, ya Schmucker, soki bolingi kotánga yango, na *Reforme ya Nkembo*, kútu, bomoni. Sikawa, motango ya bato milió ntuku motoba na mwambe ekomami na liste ya ba-martyr! Ntango moko na basantu na bango ya maloba azuaki emoniseli ete moto nyonso oyo andimelaki lingomba ya Roma te asengelaki kokufa lokola mopéngwi, epesaki bango lisusu mpiko. Ndeko, abandaki mpenza kosopa makila! A—amataki mbangu na mpunda na ye ya mpem-. . . , to, na mpunda na ye ya motane, mpe akendeki. Oh!

²⁸¹ Sikawa nguya na ye monene ezuami. Bakómisaki ye mokitani ya Lola, mpe bakómaki kokúmbamela ye lokola Nzambe. Akómi moyangeli ya mokili, na kosanganisáká lingomba ná letá elongo, yango ekómisaki ye moyangeli ya mokili; epesi ye motóle ya mokonzi likoló na yango. Akoki kosambela mpo na kobimisa milimo na epóngelo. Akoki mpe kobond-. . . Akómaki mpenza lokola Nzambe, na mokili, na esika ya Nzambe. Nyonso wana, akomaki na nguya monene ya koboma moto nyonso oyo aboyi kondima mitindo na ye. Nani akoloba na ye likambo moko? Lingomba ekoki koloba eloko moko te; ye nde mokonzi na yango. Letá ekoki koloba eloko moko te; ye nde mokonzi na yango. Boye, bato milió na milió bakufaki. Mangomba ya mike nyonso wana, ndeko, epanzanaki, ebomamaki, babomaki bandimi, bapesaki bango lokola bilei na bankosi, mpe makambo mosusu nyonso. Bomoni? “Dalagona,” Roma, “apesaki ye ebonga ná bokonzi na ye.” Biblia nde elobaki bongo. Bomoni? Na bongo, amataki na mpunda na ye

ya motane, na elilingi, aniataki makila ya bato, na lolenge ete mpunda yango ekómaki motane.

²⁸² Sikawa Yoane amoni ye likoló na mpunda ya moindo. Abongwami na eloko mosusu.

²⁸³ Sikawa nasengeli ko—koloba yango kaka ndenge eyaki epai na ngai. Na bongo, soki eyaki epai na ngai mpe elongobanaki na Makomi mosusu te, na ntango wana, boye Nzambe nde apesi yango ata moke te. Bomoni, Makomi esengeli moko na moko, yango ezali bobele eloko moko ya monene—ya monene ndenge wana. Likomi esengeli kolóngobana na Likomi. Mpe nyonso oyo ekesani na Makomi. . . Soki Mwanje na Nkolo ayebisi ngai likambo oyo ezali Makomi te, nakondimela Ye te. Bomoni?

²⁸⁴ Nalobaki, kuna na Chicago, mokolo mosusu wana, ntango batei nkama na nkama. . . Moto moko azalaki na liyangani yango? Na ntembe te. Na liyangani oyo ya Chicago, nalobaki: “Sikawa, bino nyonso bozali koloba ete bo. . . Bokanisaki ete bokozua ngai na motámbo awa, na ntina na likambo moko.” Bato bazalaki mingi lokola baoyo bazali awa sikawa. Nalobaki: “Ezali nini? Oyo bozali kotelemela ngai.” Nalobaki: “Molimo Mosanto alakisaki ngai, eleki butu misato, epai moko na moko na bino akozala. Mpe ete tokozala kuna te. . . Bótuna Carl awa, soki ezali bongo te.”

²⁸⁵ Mpe Hank ná bamosusu bazalaki wana: “Ya solo.” Bino nyonso bozalaki wana mpe boyokaki yango.

²⁸⁶ Nalobaki: “Sikawa, bozali kotelemela ngai, na Malakisi na ngai. Yango nde likambo. Sikawa nalingi ete moko na bino áya awa, zua Biblia na yo mpe telema na mopanzi na ngai, mpe talisa polele ete Ezali bongo te.” Bafandaki kimia moko oyo bomóná naino te. Nalobaki: “Likambo nini ná bino?” Nalobaki: “Boye, soki boyebi ete bokoki kobundisa Liloba te, boye bótika ngai kimia. Bino Balakisi ya Likindo ná nyonso wana, bolobelaka, bomitalisaka lokola ‘Molakisi,’ ‘Molakisi,’ ‘Molakisi.’ Mpe ngai nazali. . .” (Oh, Ndeko Wood ná ngai tolobaka “mowútá,” to “líkilí.”) “Natángá te, naleká na líkindó to eteyelo moko te. Kasi zuá Biblia na yo mpe yaka kotelema awa na mopanzi na ngai, talisa polele ete momboto na nyoka, libatisi na Nkombo na Yesu ezali lokuta, to moko na malakisi oyo ngai nateyaka.” Moto moko te alobaki likambo. Bino nyonso boyebi yango. Bafandaki kimia moko oyo bomóná naino te.

²⁸⁷ Bomoni, mosala na bango kaka kogánga lokola soki nini. Sikawa, sikawa ezali yango mpenza. Nandimaka te likambo ya kowelana ná bato, longola bobele soki ekómína esika oyo balukaka kokotisa yo na makasi. Ngai nalingaki kokende te, kasi Molimo Mosanto ayebisaki ngai, Alobaki: “Kende kuna. Nakotelema mpembeni na yo.”

²⁸⁸ Nayebisaki bango yango, mikolo misato to minei liboso na yango. Bino nyonso oyo bozalaki kuna, boyokaki M. Carlson ná

bamosusu, Ná—Ná Tommy Hicks. Mpe bango nyonso bafandaki wana. Mpe nakendeki, mikolo misato liboso na yango, mpe nalobaki: “Bokosengela kotika esika oyo bosilaki kozua.”

²⁸⁹ Ezalaki butu moko ya mopepe makasi. Nazalaki na kati ya liyangani moko. Alobaki: “Kende kotelema na lininisa wana, na mwa ekuke ya misato wana.” Nakendeki wana mpe natelemaki wana. Nazalaki kotala libanda ndenge wana.

²⁹⁰ Alobaki: “Batieli yo motámbo. Bakosenga yo ete óloba na Lisanga ya Batei ya Grand Chicago.” Alobaki: “Batieli yo motámbo, na ntina na malakisi na yo ya Liloba na Ngai.”

²⁹¹ Alobaki: “Sikawa, bakozua lisusu te esika oyo wana kuna. Bakozua yango te. Bakokende na esika moko oyo ezali na lángi ya shokola.” Alobaki: “Ezalaki lokola esika oyo.” Natelemaki, mpe namimonaki na litumú moko; nabwakaki miso kuna mpe namonaki. Namonaki bango nyonso kuna. Namonaki batei nyonso wana bafandi kuna, ndenge bazalaki. Natalaki bango nyonso malamumu. Mpe Alobaki . . .

²⁹² “Oh,” namilobelaki, “malamu ete nákende na ngai kuna te kasi, Nkolo, soki bakosala bongo. Nalingi te koyokisa bango mitema mpasi to kosala mabe moko.”

Alobaki: “Kende. Nakotelema mpembeni na yo.” Asalaki yango. Ya solo.

²⁹³ Sikawa, bino nyonso, ezali na banzeneneke oyo bazali awa, oyo bazalaki wana mpe bayebi ete ezali ya solo. Ya solo. Ee, bozali mpe na ba-bande yango awa. Kasi, ezali yango mpenza, bomoni.

²⁹⁴ Sikawa, sikawa libombami ya likambo oyo, yango oyo. Sikawa, Yango, Emonisamelaki ngai lelo na ntongo-ntongo, liboso ntongo étana. Na bongo nazuaki Makomi mbangu-mbangu mpe nabandaki koluka, koyekola yango. Ezalaki mpenza bongo. Kino lelo, misato kati na yango esili komonisama na ndenge ya kokamwa mpenza. Iyo. Sikawa libombami ya mpunda ya moindo yango oyo, kokokana na oyo emonisamelaki ngai.

²⁹⁵ Abandaki kotambola ná yango na ntango ya bileko ya molili. Yango nde eloko oyo mpunda ya moindo ezalaki kotalisa, bileko ya molili, mpo ezalaki ngonga ya minwí mpo na bandimi ya solo oyo batikalaki. Bótala malamumu sikawa, na eleko ya lingomba yango, eleko ya lingomba oyo ya katikati, eleko ya lingomba ya molili. Bótala malamumu ndenge Alobi: “Ozali bobele na makasi moke.” Ezalaki minwí mpo na bango, mpo na mondimi ya solo. Sikawa, bótala malamumu. Penepene na elikia nyonso esilaki kolongolama na Lingomba ya solo, mpo moto oyo azalaki kokonza lingomba ná letá. Bakosala nini? Bomoni, Bokatoliko esilaki kozua bokonzi likoló na lingomba ná letá. Mpe bato nyonso oyo bazalaki kondima Bokatoliko te, bazalaki kobomama. Yango wana azalaki likoló na mpunda ya moindo.

Mpe bótala malamumu likambo ya molili oyo asalaki, bomoni, na bongu bokosósola. Mpe bino. . . Soki oyebi histoire malamumu, landela yango, na bongu oko. . . Ee, okozala ata na ntina ya koyeba yango te, mpo—mpo na koyeba Likambo oyo. Sikawa bótala malamumu. Elikya nyonso esilaki. Yango nde mpunda na ye ya moindo.

Sikawa, abandaki na mpunda na ye ya mpembe, mayele mabe.

²⁹⁶ Na nsima apesamaki nguya; alongolaki kimia, abomaki bamilió ya bato. Yango nde alingaki kosala, wana azalaki kokóba kotambola. Mpe azali kosala yango kino lelo. Bomoni?

²⁹⁷ Sikawa, ye oyo, likoló na mpunda na ye ya moindo sikawa, azali koya. Eleko ya molili, ezalaki nde ntango wana. Kaka pene na ntango oyo nsima na lingomba kotiyama mpe kozua bokonzi, bafinaki bitonga mosusu nyonso. Mpe esalaki mibu nkama na nkama na nkama, tóloba, ezali eloko oyo batángi nyonso bayebi lokola eleko ya molili. Bato boni bayebi yango? Ya solo, eleko ya molili. Yango nde mpunda ya moindo, kotalisáká eleko ya molili yango. Na ntango yango, elikia nyonso esilaki; elikia ata moke te. Nyonso ekómaki lokola molili, mpo na etonga moke ya bandimi. Sikawa, yango nde ntina ebéngamaki, etalisami na mpunda ya moindo.

²⁹⁸ “Asimbaki bimekeli, to bimekeli-kilo na loboko na ye,” bomoni. Kobéleláká: “Kopo moko ya blé denali moko, mpe kopo misato ya loso denali moko.” Bomoni, ezali mpenza, blé ná loso ezali biloko ya mokili oyo mpo na kozala na bomoi. Basalaka na yango lipa ná biloko mosusu. Kasi, bomoni, azalaki kofutisa bato mbongo mpo na yango. Oyo yango elingi koloba ezali ete azalaki kofutisa bato na ye mbongo mpo bázuu lolenge ya elikia ya bomoi oyo azalaki kotindela bango, na kosaláká ete. . . Na ntango wana mpenza nde abandaki kosala ete báfuta mbongo mpo na mabondeli, kofutisa mbongo mpo na libondeli. Bazali kosala yango kino lelo; ba-neuvaine.

²⁹⁹ Mpamba te, azalaki kosala nini? Kobótola bozui ya mokili mobimba. Emekeli-kilo ezalaki kopíma “kopo moko ya blé denali moko; kopo misato ya loso denali moko.” Mobuti-mpunda likoló na mpunda ya moindo, bomoni, azalaki kosala. . . kobótola bato na ye mbongo na bango. Na ntango Biblia oyo elobi ete asimbi, pene na, bozui ya mokili mobimba. Ndenge tolobaki lobi na mpokwa na ntina na Russie, ná nyonso wana, bazali mpenza kozua mbongo nyonso mpe kobótola bato nyonso oyo bazali na yango, nyonso. Boye, ezali yango mpenza.

³⁰⁰ Sikawa bótala. Bomoni epai likambo ya kala, ya kokongola mbongo na kati ya losambo ewútáka? Bózala mosika na likambo yango; mpo na kotonga ebongiseli moko, eloko moko ya monene, ya ba-dollar milió mobimba awa. Mpe—mpe bomoni oyo mama na yango azali?

301 Matondi, Nkolo. Oh, la la! Nasepeli mingi. Iyo, mesie. Malamu. Ezalaka nde ngolu na Ye. Eloko mosusu te. Malamu. Malamu.

302 Ezalaki ngonga ya minwí. Bosósoli yango sikawa? [Losambo balobi: “Amen.”—Mok.] Mpe ye oyo azali kofutisa bato mbongo mpo na lolenge ya bomoi yango, elingi koloba loso ná nyonso wana, biloko ya mokili; ezalaki biloko ya molimo te. Ezalaki loso, bomoni, boye, lipa ya loso ná lipa ya blé. Azalaki kofutisa bato mbongo mpo na lolenge ya bomoi oyo azalaki kopesa na bato na ye. Azalaki kofutisa bato mbongo mpo na mabondeli na basángó, mpo na kobimisa bato na epóngelo na mabondeli. Kofutisáká mbongo! Sikawa nazali kozua yango mbala moko na histoire. Kofutisáká mbongo, nabanzi, mpo na neuvaine, nabanzi, oyo yango. . . moto nyonso awa ayebi oyo yango. . . neuvaine, nabanzi ete ezali likambo moko oyo moto asengeli kosala, boyebi, komipesa etúmbu ya ntubela. Moto moko asengeli kofutisa mbongo mpo na yango. Kobendáká bozui ya mokili mobimba epai na ye, epai na ye moko, na lingomba yango moko. Mpe azali komata mpunda kino lelo. Oh, ya solo mpenza. Iyo, mesie. Azali komata mpunda kino lelo!

303 Bótala. Eteni ya malamau yango oyo sikawa. Bótala.

. . . *kobebisa* vinyo mpe mafuta oyo te.

304 “Etikali kaka moke kuna, kasi komeka kosimba Yango te!”

305 Sikawa, mafuta ezali. . . etalisaka Molimo, Molimo Mosanto. Nakopesa bino mwa milongo, soki bolingi. Biteni ya Makomi ezali mibale. Na Lewitiko, 8:12, epai Alona, liboso ákota, asengelaki kopakolama mafuta, boyebi. Mpe na Zakaria 4:12, mafuta ezalaki koya, kosopana na ba-tiyó, mpe alobaki: “Oyo ezali Molimo na Ngai, Mafuta.” Eloko mosusu, soki bolingi kotala na Matai, 14. . . 25, ezalaki na mongondo ya zoba azalaki wana, to na 25:3, mongondo ya zoba yango azalaki na Mafuta te, azalaki na Molimo te. Mpe Matai 25:4, mongondo ya bwanya azalaki na Mafuta na mwinda na ye, atondisamaki na Molimo. Molimo! Mafuta ezalaka elilingi ya Molimo. Oh, nkembo! Malamu. Bososoli yango? [Losambo balobi: “Amen.”—Mok.] Malamu. Sikawa, mafuta etalisaka Molimo.

306 Mpe vinyo etalisaka bopunzwami ya emoniseli. Oh, na—nayoki mposa ya kopota mbangu na ndako mobimba. Nazali kokamwa ndenge nini nalamusaki bazalani te, ntango Nkolo alakisaki ngai yango, bomoni, “bopunzwami ya emoniseli.” Bomoni?

307 Mafuta ná vinyo, na Biblia, ezalaka elongo, ntango nyonso. Nazuaki concordance mpe natalaki yango. Ezali ebele, lokola—lokola *boye*, biteni oyo vinyo ná mafuta ezalaka elongo, ntango nyonso. Bomoni?

308 Ntango Solo ya Liloba lilakami ya Nzambe emonisami mpenza na basantu na Ye oyo batóndisami na Mafuta, bango

nyonso bapunzwamaka mpenza. Vinyo ezali bopunzwami. Nkembo! Nazali koyoka yango sika-sikawa. Bapunzwami ná esengo, kogánga! Bomoni? Mpe, ntango Esalaka bongo, Esalaka bango ndenge moko, ndenge—ndenge vinyo esalaka epai ya moto ya mosuni. Mpamba te, ntango emoniseli ya Solo ya Nzambe epesami, mpe mondimi ya solo atondisami na Mafuta, mpe emoniseli yango emonisami, bopunjwami ekómaka makasi mingi na lolenge ete Asalisaka ye makambo ya libanda na momesano. Ya solo. Nkembo! Bomoni, yango nde likambo ná bango sikawa. Ya solo, esalaka ete bákóma kosala makambo emonanaka lokola libanda na momesano.

³⁰⁹ Sikawa, soki bolingi Likomi mpo na yango, bóbanda kotánga Misala 2. Bazalaki wapi? Bazalaki na elaka oyo esiláká kopesamela bango. Na ntango elaka mobimba ya Molimo Mosanto esopanaki likoló na bango. Mpe ezalaki. . . Etatolamaki kokokana na Makomi. Sikawa, bomoni, ba. . .

³¹⁰ Bongo soki bálobaka. . . “Sikawa, bózela, Ayebisaki biso ete tózela awa mpo tózua lotomo na biso.” Mpe nsima na mikolo mwambe, soki bálobaka: “Ee, bóyoka, bandeko,” soki Malako álobaka na Matai ete, “Na—nandimi ete tosili kozua Yango, bancinga. Bomoni bongo te? Bomoni, tosili kozua Yango. Wana tozali kozela lotomo na biso, tosengelaki kaka kobima, kokende koteya. Ayebisaki biso ete tómata awa mpe tózela, mpe mikolo mwambe ekoki oyo tozali awa.”

“Ee, tózela lisusu mokolo moko.”

³¹¹ Mikolo libwa ekoki. Na nsima, Malako ayei, to—to—to ntango mosusu moko na bamosusu, Yoane, alobaki: “Na—na—nandimi ete tosengeli lisusu kozela te. Nandimi ete tosili kozua Yango. Boye te?”

³¹² Na bongo nakoki komona Simona, mpo ye moto azalaki na mafungola, boyebi. “Sikawa bózela naino, bandeko! Makomi ezali na likambo moko elobeli na ntina na likambo oyo. Atikálá koyebisa biso mpenza te soki tosengeli kozela mikolo boni. Alobaki: ‘Bótikala kuna kino! Bótikala kuna kino lisakoli ya Yowele ékokisama, kino lisakoli ya Yisaya ékokisama.’”

³¹³ “Mpamba te, na bibebu ya likukuma mpe na minoko mosusu nde Nakoloba na libota yango. Mpe yango nde ekokitisa motema.” Yango nde vinyo oyo esopani. Vinyo ezali nini, na Biblia? Masanga ya mpio. “Oyo nde masanga ya mpio oyo euti na Bozali ya Nkolo.” Bomoni? E—esengeli kolóngobana na Makomi sikawa. Bomoni?

³¹⁴ Boye, bomoni, vinyo etalisaka bopunzwami ya emoniseli. Mpe ntango Molimo Mosanto ekitaki, mpe ntango bamonaki Móto ya Nzambe kokita likoló na bango, oh, la la, ebandaki kopesa bango bopunzwami. Mpe, na mbala moko, bapunzwamaki mpenza na lolenge ete bato bakanisaki mpenza ete balángwaki masanga, kasi bapunzwamaki na nzela na

emoniseli. Na emoniseli ya Nzambe...Bóyoka malamú! Emoniseli ya Nzambe oyo etatolami, ekómaki polele mpo na bango, bakómaki na esengo mpo na Yango. Nzambe asilaki kolaka yango. Na ntango yango emonisamaki na bango, mpe etatolamaki na bango. Amen! Moto moko atelemaki wana, alobaki: “Oyo nde Yango! Ezali mpenza Yango!” Mpe Ezalaki wana, ezalaki kotátolama na elembo moko oyo biso tozali na yango lelo. Yango nde—yango nde bopunzwami na nzela na emoniseli. Bomoni? Mpe, na ntango yango nde bazuaki Yango mpenza.

315 Yango wana Petelo akokaki kobima kuna, mpe koloba: “Ee, bino mibali ya Yuda, ná bino bafandi ya Yelusaleme, bóyoka ngai. Bino Balakisi nyonso ya Bonzambe, bóyoka oyo nakoyebisa bino, bomoni.”

316 Oh, kitoko mingi! Emonisami! Emonisami! Bakomaki ya kopunzwama mingi ntango bamonaki yango kotatolama. Esalaka ntango nyonso bongo. Ntango nyonso.

317 Ntango namonaka ete Nzambe alakaki ete Akosala likambo moko na eleko oyo, ntango Alakaki ete Akobuka Bilembo oyo na mokolo ya nsuka oyo! Boyebi te esengo mpe nkembo oyo nazalaki na yango, ntango namonaki Ye komonisa yango, natelemaki wana mpe kotala yango kosalema! Mpe koyeba ete nakoki kobeta mondenge ata na nani: Atikálá koloba na biso naino likambo moko te oyo ezángá kosalema bongo. Mpe komona esengo oyo ezali na motema na ngai, ntango nazali komona elaka na Ye mpo na mikolo ya nsuka oyo, ndenge Alakaki kosala yango. Mpe nazali komona yango kotatolama mpe kokokisama na kobonga be mpenza. Nazali mpenza... Boyokaka ngai koloba: “Namiyoki mosambeli.” Ezalaka mpenza bongo. Bopunzwami ekómaka mpenza makasi, na—na—nakoki—nakoki kobanda liboma, boyebi. Bopunzwami, uta na emoniseli! Malamú.

318 Bakómaki ya kopunzwama mingi, na ntina na—na emoniseli, na lolenge ete batátolaki elaka yango, malamú. Sikawa, oh, la la! Batondaki na esengo ya bopunzwami, na lolenge ete bato balobaki: “Balángwe na vinyo ya sika,” ntango Nzambe amonisaki elaka na Ye epai na bango. Mpe Amonisaki yango kaka te, kasi Atalisaki yango polele.

319 Yango nde nalobaka ntango nyonso. Moto akoki koloba ata nini, iyo, akoki kozala na makoki ya koloba ata nini; kasi ntango Nzambe ayei mpe atatoli yango!

320 Sikawa, Biblia elobi: “Soki moto moko azali katikati na bino, oyo alobi ete azali moto ya molimo to mosakoli, soki alobi makambo oyo kasi ekokisami te, na bongo bókipé ye ata moke te. Bóbanga ye ata moke te. Bóbanga moto yango te. Kasi soki alobi likambo mpe ekokisami; wana ezali Ngai, bomoni. Ngai nazali kati na yango. Wana etalisaka polele ete ezali Ngai.”

321 Lisusu, mwasi Mosamalia wana. Lokola Makomi elobáká ete Masiya yango akosala makambo oyo, mpe Ye atelemaki awa mpe asalaki yango mpenza ndenge Makomi esilaki koloba. Mwasi yango alobaki: “Ye wana. Bóya kotala Moto moko! Ezali mpenza likambo oyo Makomi elobaki ete ekosalema, boye te?” Bomoni, apunzwamaki na nzela ya emoniseli. Boye te? Akomaki ya kopunzwama na nzela ya emoniseli, ntango yango etatolamaki. Bomoni? Ya solo. Ayebaki ete ezalaki na . . .

322 “Toyebi ete Masiya, Oyo abiangami Klisto, azali koya. Mpe ntango Akoya, Akosala makambo oyo.” Amonaki yango.

Mpe Alobaki: “Nazali Ye.”

323 Na bongo bopunzwami ebandaki. Mpe akendeki, kogángáká, na engumba mobimba. Atikaki mbeki na ye, akendeki kuna, mpe alobaki na bato: “Boya kotala!”

324 Sikawa, soki boyebi mimesano ya Esti, ezali mabe mpo na ye mwasi kosala bongo. Iyo, mesie. Mwasi ya ndenge wana, moto moko te alingaki koyoka ye. Te, mesie. Bomoni, azalaki na elembo moko, mpe ntango a . . . Soki akiti na balabala ndenge wana, ná ezaleli ya ndenge wana, mibali ya balabala balingaki kokéba na ye ata moke te.

325 Kasi, ndeko, kuna, azalaki na Liloba ya Bomo! Apunzwamaki. Bokoki . . . Ezalaki lokola koluka koboma móto na ndako oyo ezali kozika na mokolo ya mopepe makasi. Oh, eloko moko ezalaki kofúla yango! Mwasi yango Asilaki—asilaki kobongama. Iyo. Bakokaki koboma Yango te. Wana ezalaki kopela ya Móto ya Nzambe. Iyo, mesie. Alobaki: “Soki bondimi te ete ezali bongo, boya awa epai mayangani ezali kosalema. Nakolakisa bino yango.” Iyo. Ezali bongo. Iyo. Iyo, mesie.

326 Na bongo bato yango bakendeki kuna. Kasi Asalaki yango lisusu te. Kasi bayebaki ete likambo moko eutaki kokómela mwasi yango. Abóngwanaki, na bongo, bandimaki Ye. Iyo, mesie. Bandimelaki Ye.

327 Mpamba te: “Kondima eutaka na koyoka, koyoka elaka ya Nzambe, Liloba na Nzambe, mpe komona Yango kokóma solo.” Mpamba te, Ezali momboto. Soki Elónami, Ekozua Bomo. Ekobóta bebele oyo Yango ezali kolobela. Soki esali yango te, ezali mpe Momboto ya Nzambe te. To, molóni ayebaki ndenge ya kolóna Yango te; Atindamaki na Nzambe te, mpo na kolóna Mimboto. Ntango mosusu azalaki kolona Yango likoló na libanga to eloko moko bongo. Bomoni? Boye bo—boye bomoni, ntango molóni alónaka Momboto, Nzambe abatelaka Yango, Ekweyaka na esika oyo esengeli, bomoni. Oh, la la!

328 Na bongo, Elobi nini epai na mobuti-mpunda ya moindo? “Kobebisa Vinyo na Ngai ná Mafuta na Ngai te! Kosimba Yango te, Vinyo ná Mafuta na Ngai! Nazali na Yango bebele moke na mokili, kasi ezali naino mwa moke kuna. Iyo. Sikawa, okoki

kokóba komeka kilo na nyonso wana mpe kokabola lolenge ya bomoi wana; oyo wana etali yo. Okofuta mpo na yango na nsuka. Kasi soki okutani na vinyo ná Mafuta wana, tika Yango kimia!" Oh, la la! Soki bokoki, soki bo. . .

³²⁹ Na elobeli mosusu, boye: "Soki okangi bato mosusu ya Etonga moke na Ngai, baoyo batondisami na Mafuta ná vinyo na Ngai, bomoni, vinyo ná Mafuta ya Liloba peto, bomoni, lokola olingi koboma bango. Mpamba te, yo nde ozali kosala yango. Yango nde ozali kosala. Kotinda bango na makasi te ete báloba 'Maria losako,' to básala likambo moko ya ndenge wana, to báloba bindimeli na yo. Komeka kosimba bango te. Bayebi epai bazali kokende, mpo bapakólami na Mafuta na Ngai. Mpe lokola bapakólami na Mafuta na Ngai, bazali na vinyo ya esengo, mpo bayebi Liloba na Ngai ya elaka ete: 'Nakosekwisa bango.' Kobebisa Yango te! Kokende te koluka kosala bango mobulu. Mpamba te, zala kaka mosika na Yango. Te." Nyonso. . .

³³⁰ Atatolaka Liloba na Ye mpe Akokisaka Yango. Bayebaki. Bayebaki ete bakosekwa lisusu. Oh, ndenge nasepeli na yango! Fiuu! Bakosekwa. Tala mpunda ya moindo yango ezali koya, ezali koya sikawa, eleko ya molili.

³³¹ Mpunda ya mpembe elekaki; tomonaki oyo asalaki, na kobonga be mpenza. Mpunda ya motane eyei; tomoni mpenza oyo asalaki. Mpunda ya moindo eyei. Bomoni, azali kaka mobuti-mpunda yango ntango nyonso, makambo oyo azali kosala, na kati ya bileko.

³³² Sikawa tomoni ete azalaki komeka kilo na yango mpe kofutisa bato mbongo mpo na yango, ya solo mpenza: blé ya mokili oyo, bomoi ya mokili oyo. Yango nde bazalaki kobika na yango.

³³³ Kasi, ezalaki elembetele; Molimo, Mafuta; mpe esengo ya vinyo. "Bomoi oyo ya molimo, kobebisa Yango te. Tika Yango kimia!" Na elobeli mosusu: "Roma, komeka kosimba Yango te! Ezali ya Ngai! Ezali ya Ngai!"

³³⁴ Sikawa nazali na likambo mosusu awa oyo nalingi ete bóyeba. Bótala, ezalaki te moko na Bizàli-na-bomoi nde alobaki: "Kosimba Mafuta ná vinyo te." Bomonaki yango? Bizàli-na-bomoi minei bautaki koloba, kasi. . . Bótala malamumu, bótika ete nátánga yango mwa moke, bomoni, sikawa.

. . . moko, denali moko, mpo — mpo . . . blé denali moko,
mpe kopo misato na loso denali moko; mpe bebisa vinyo
mpe . . . mafuta te.

³³⁵ Sikawa bóyoka likambo oyo.

Na — nayokaki mongongo lokola katikati na bijàli-na-bomoi minei. . .

³³⁶ Ezalaki nini? Mwana-mpate! Amen! Ezalaki Bizàli-na-bomoi minei te. Mwana-mpate nde alobaki yango. Mpo na nini?

Akozua baoyo ya Ye Moko. Bazali baoyo ya Ye. Asili kosikola bango. Bomoni? Amen! “Komeka kosimba Mafuta wana te!” Te, mesie. Bizàli-na-bomi minei te, kasi Mwana-mpate nde alobaki bongo. Mpe, oh, la la! Mwana-mpate! Ezali te. . . Bizàli-na-bomoi minei nde bapesaki liyebisi yango te. Mwana-mpate Ye moko nde alobaki bongo.

³³⁷ Ntango Bizàli-na-bomoi minei balobaki: “Yaka komona,” mpe bakendeki, mpe bamonaki yango ndenge wana.

³³⁸ Mpe Alobaki: “Kopo moko ya blé denali moko, mpe mpo na kop-. . . mpe motángo *boye*, mpe motángo ya kopo ya loso boye.” Kasi na nsima, Mwana-mpate agángaki, na katikati na bango, Alobaki: “Kasi kobebisa vinyo ná Mafuta te!” Ah-ah. Ezali solo. Oh, la la! Bóyoka: “Komeka kobebisa Yango te, yo, soki te okofuta mpo na yango mokolo moko.” Oh, la la!

Ngonga ya libwa na ndambo.

³³⁹ Ee, na lisosoli na ngai ya malamú koleka, mpe na oyo ya malamú koleka ngai nayebi, mpe na nyonso oyo nandimi na motema na ngai, yango nde ndimbola ya solo ya Bilembo misato wana. Nalingi kotóndo Nzambe mpo na yango. Mpe nakoloba boye, ete ezali emoniseli oyo Apesi ngai. Apesaki yango epai na ngai, emoniseli na Yango. Mpe nandimi mpenza ete tozali kobika na mikolo ya nsuka.

³⁴⁰ Lobi na mpokwa, tokozua mobuti-mpunda wana ya langi ya púú. Sikawa nayebi te. Nayebi te. Nzambe ayebi ete ezali ya solo. Nayebi eloko moko te na ntina na yango. Te.

³⁴¹ Nabwakaki miso na makambo oyo nakomá eleki mibu ebele. Namonaki Ndeko Graham Snelling kala mingi te; ntango mosusu akei. Kasi, nayebi lisusu ntango nazalaki koteya awa, liboso. Nabwakaki miso mpo na komona oyo nalobaki eleki mibu ebele. Mokolo moko, nazalaki kotanga Buku ya Emoniseli, nazuaki babuti-mpunda nyonso minei na mbala moko.

³⁴² Nalobaki: “Mpunda ya mpembe, ezalaki lingomba ya ebandeli, na ntembe te.” Natángáká yango na buku moko ya ba-Adventiste. Mpe natángaki likambo moko kuna. Nalobaki: “Oyo wana ezalaki lingomba ya ebandeli oyo ekendeki mpo na kolóngá.” Ya mibale ezalaki mpunda ya moindo, nalobaki. . . Nabosani sikawa ndenge nabengaki mpunda ya moindo wana. Nalobaki. . .

³⁴³ To: “Mpunda ya motane,” kútu, nalobaki, “mpunda wana ntango mosusu ezalaki kolakisa ete—ete mikakatano ezali na nzela, mpe ekokutana na bitumba ebele oyo ekolandana, to eloko moko ya ndenge wana.” Nalobaki: “Ntango mosusu bitumba ekozala mingi.” Nalobaki: “Nde oyo esengeli kozala.” Na nsima, nalobaki: “Mpunda ya—ya mai ya kung-. . .”

³⁴⁴ To: “Mpunda ya—ya moindo,” nalobaki, “elingi ko—koloba ete—ete ntango mosusu ntango moko ya molili ekoya na mokili,

ntango minzoto nyonso eko—ekotika kongenga; moi ekolala, mpe sanza ekopesa pole na yango te.” Nalobaki: “Ntango mosusu elingi koloba bongo.”

³⁴⁵ Nalobaki: “Mpunda ya langi ya púú, elingi koloba maladi mingi ekoya.” Sikawa, nayebi te soki elingi koloba nini. Kasi, oyo wana ezali, ezalaki ndimbola na ngai mpo na yango, na ntango wana, mpo eutaki na boyebi oyo nazalaki na yango, wana nazalaki na eteyelo awa.

³⁴⁶ Kasi, oh, etikalaki moke náloba likambo moko! Malamu. Hmm! Oh! Boko—bokomona. Bótala malamumu, bomoni.

³⁴⁷ Sikawa, oh, tozali mpenza na esengo mpo na ntango oyo tozali kobika kati na yango! Ntango tozali komona nyonso oyo kosalema, nakanisaka:

Bikólo ezali kopanzana, Yisraele ezali kolamuka,
Bilembo oyo basakoli basakolaki;
Mikolo ya Mabota ekómi ya kotánga, etondi na nsomo;
“E baoyo bapalanganaki, bózonga epai na bino.”

Mokolo ya lisiko ebelemi,
Mitema ya bato ezali kokweya na nsomo;
Bótondisama na Molimo, miinda na bino élangelama mpe éngengisama,
Bótombola miso, lisiko na bino ebelemi! (Oh, la la!)

Basakoli ya lokuta bazali kokosa, bazali kowangana Solo ya Nzambe,
Ete Yesu Klisto azali Nzambe na biso;

Bino bondimi Yango?

Kasi biso tokolanda matambe ya bantóma.
Mpo mokolo ya lisiko ebelemi,
Mitema ya bato ezali kokweya na nsomo;
Bótondisama na Molimo, miinda na bino élangelama mpe éngengisama,
Bótombola miso, lisiko na bino ebelemi!

³⁴⁸ Ezali kitoko mingi, boye te? Nalingaka yango mingi. Lisiko ebelemi.

Mpe Pole ekozala na ntango na mpokwa,
Nzela moke ya Nkembo bokomona yango solo;
Na nzela ya mai, Pole ezali lelo;
Na kokundama na Nkombo ya motuya ya Yesu.
Bilenge mpe mikóló, bobongola mitema na masumu na bino nyonso,
Molimo Mosanto akokota solo;
Pole ya mpokwa esili koya,

Ezali solo ete Nzambe ná Klisto bazali Moko.

Azali Liloba! Oh, la la! Kitoko mingi!

Kala mingi te Mwana-mpate akozua Mwasi na libala na Ye mpo ázala na mopanzi na Ye, Mampinga mobimba ya Likoló bakosangana; Oh, komona yango ekozala likambo ya nkembo, basantu nyonso bakolata bilamba ya mpembe pee;

Mpe bakosala féti ya Seko elongo na Yesu.

Oh, “Yaka kolia,” Mokonzi azali kobenga: “Yaka kolia;”

Oh, Okoki kolia na féti ya Yesu ntango nyonso; Ye oyo aleisaki bankóto ya bato, mpe abongolaki mai na vinyo,

Azali kobenga ye oyo azali na nzala: “Yaka kolia.”

Oh, “Yaka kolia,” Mokonzi azali kobenga, “yaka kolia;” (Kolia Liloba!)

Oh, Okoki kolia na féti ya Yesu ntango nyonso; Ye oyo aleisaki bankóto ya bato, mpe abóngolaki mai na vinyo,

Azali kobenga ye oyo azali na nzala: “Yaka kolia.”

³⁴⁹ Oh, la la! Bozali na nzala? “Esengo na baoyo bazali na nzala ná mposa ya boyengebene.”

³⁵⁰ Bolingi Ye? Bolingi Ye? Banda loyembo ya *Nalingi Ye*, boyebi. Biso nyonso tótelema sikawa, tótombola maboko mpe tósolola na Ye. “Nalingi Ye, nalingi Ye mpo Alingaki ngai liboso.” Malamu, biso nyonso elongo sikawa.

Nalingi Ye, nalingi Ye
Mpo Alingaki ngai liboso
Mpe Asombi lobiko na ngai
Likoló na Ekulusu.

³⁵¹ [Ndeko moko alobi minoko na sika—Mok.] Bózala mpenza na limemia. Tozali na molimboli moko awa, Ndeko Higginbotham. Nayebi te soki azali awa na mpokwa oyo, to te. Tolingi, koyeba eloko oyo Alobi na biso. Bózela naino. Awa, awa... [Ndeko mwasi moko alimboli.]

³⁵² Ya solo, nkembo na Nkolo! Kondima na ngai etombwani likoló kati na Nzambe. Bino, bino bolingi Ye, na mpokwa oyo, na motema mobimba? Oh, bósanzola Ye, mpe bóloba: “Matondi, Nkolo Yesu!”

³⁵³ Topesi Yo masanzoli, na motema mobimba, Nkolo! Nkembo na Nzambe!

³⁵⁴ Bópesa Ye masanzoli, bino nyonso. Nzambe ázala na bino!



63-0320 Elembo Ya Misato
Branham Tabernacle
Jeffersonville, Indiana U.S.A.

LINGALA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org